

# 中國全華中 名勝古蹟大觀



浙江	第十編	江西	第九編	安徽	第八編	目次
----	-----	----	-----	----	-----	----



## 大陸圖書公司 行 印

# 中華名勝古蹟目錄

## 第八編 安徽

### 一 安慶

龍眠山 小孤山 潛山 浮山 盡忠池 惜陰亭 秀英亭 涪翁亭 分經臺  
一—五

孝義墩

### 二 廬州

浮槎山 梅山 巢湖 箏笛浦 九華樓 假月城 明遠臺 藏舟浦 稻孫樓  
五—一〇

周瑜墓

### 三 鳳陽

八公山 塗山 垓下 含桃閣 留犢亭 嗟虞墩  
一〇—一二

### 四 潁州

一—一五

九 九龍井 · 八角臺 · 聚星堂 · 會老堂 · 雙柳亭

五 泗州 ····· 一五——一七

紅山 掛劍臺 望夫石 翠屏堂

六 六安 ····· 一七——一九

英山 霍山 灑臺 玉虹泉

七 滁州 ····· 一九——二一

琅琊山 龍蟠山 懷嵩樓 醉翁亭 茶仙亭 清流關

八 和州 ····· 二一——二四

烏江浦 漁邱渡 鎮淮樓 水心亭 清風樓 張籍宅

九 池州 ····· 二四——二五

九華山 秋浦 菊江亭 金雞石

十 寧國 ····· 二五——二八

隱雨巖 敬亭山 疊嶂樓 甘公城 萬卷堂 六勸亭

十一 太平……………二八一—三三一

青山 龍山 白紵山 九井山 燈犀亭 捉月亭 白馬山 赭山 大荆山

蟻磯 留春園 滴翠軒

十二 徽州……………三二一—三三五


白嶽山 靈巖洞 小桃源 任公溪 李白釣臺 文公闕里 黃墩 翠眉亭

十三 廣德……………三五—三六

竹山 靈山 桃姑洞 范公亭

---

中華名勝古蹟 第八編 目錄



# 中華名勝古蹟

## 第八編 安徽

### 一 安慶

安慶古皖伯國。故稱皖省。其城北負盛唐山。南臨揚子江。江水三面繞城。一遇淫潦。輒致暴漲。江路上通九江。以小孤山爲扼束。下達江寧。以東西梁山爲重阻。左右足以控制。

#### 龍眠山

龍眠山在桐城縣東。巖壑閒雅。宋李公麟隱居其間。擅於書畫。自作山莊圖。傳爲世寶。公麟字伯時。好學博雅。長於詩。多識奇字。自夏商以來。鍾鼎尊彝。皆能考訂世次。辨別款識。爲考古圖。以行於世。朝廷得一玉璽。衆莫辨。公麟曰。此秦璽。用藍田玉。非昆吾刀莫治。上嘉其識。善丹青。妙絕冠世。黃庭堅謂

其風流不減古人。元符間。歸老居龍眠山莊。號龍眠居士。

### 小孤山

小孤山在宿松縣南。揚子江北岸。孤峯峭拔。怪石層列。上有神女廟。南臨彭郎磯。故世俗有小姑嫁彭郎之謬語。元時天歷中。立鐵柱於山上。題曰海門第一關。字跡清晰。

### 潛山

潛山在潛山縣西北。一名皖山。周大夫皖伯封此。因名。又名天柱山。漢武帝南巡禮潛之天柱。以代南嶽。故亦稱霍嶽。高四千二百尺。廣二百三十里。潛山縣在其南。霍山縣六安州在其北。山中盛產茶。著名於世。上有左慈煉丹房。東有激水。冬夏懸流。瀑布千丈。瑩然若絹。山有二十二峯。八嶺。十二巖。其支脈曰三祖山。有璨師塔。一名山谷。宋黃庭堅寓此。因以爲號。

### 浮山

浮山在桐城縣東九十里。上有三十六巖。七十二峯。大江環繞。望之若浮。亦名浮渡山。山半有一巖。石隙崖磳。清泉噴吐。懸爲瀑布。高數百仞。尤爲奇絕。

### 盡忠池

盡忠池在懷寧縣城內。舊名清水塘。元末余闕殉難於此。後人憐其忠節。因名池曰盡忠。余闕天資英邁。博學能文。元至順中舉進士。至正間擢淮南宣撫副使。分守安慶。以孤軍血戰。及城破。力竭投池而死。謚文忠。明贈謚忠宣。命有司立祠祀之。著有青陽集。

### 惜陰亭

惜陰亭在桐城縣東南樅陽鎮。晉陶侃令樅陽。後人慕之。取其大禹惜寸陰。吾人當惜分陰之語。爲建此亭。

### 秀英亭

秀英亭在潛山縣北廣教寺。相傳爲漢喬公故居。喬公有二女。皆國色。卽大



喬小喬是孫策納大喬。周瑜納小喬。策嘗戲謂瑜曰。二喬背離鄉井。然得吾二人爲壻。亦足快矣。後人於其故址築亭。徧栽松竹。宋黃庭堅有句云。松竹二喬宅。雪雲三祖山。

### 涪翁亭

涪翁亭在潛山縣西北二十里山谷寺中。以黃庭堅得名。寺中有涪翁讀書臺遺址。李公麟嘗畫黃庭堅坐石牛山。庭堅因自號山谷道人。題詩其上。所謂青牛駕我山谷路是也。

### 分經臺

分經臺在宿松縣北五十里。石臺高百尺。梁昭明太子嘗於此分金剛經爲三十二分。宋嘉泰間。建亭於其側。名曰法華亭。

### 孝義礮

孝義礮在望江縣南。唐孝子徐仲源事母至孝。母疾篤。仲源割股爲糜以進。

母疾尋愈。德宗勅於其母墓旁築孝義礫以表旌之。

## 二 廬州

廬州在安慶府北。周初爲廬子國。春秋屬舒。戰國屬楚。漢曰廬江。東漢曰合肥。梁置合州。唐改廬州。元設廬州路。明爲府。四圍環山中抱巢湖。其城瀕於淝水支流長岡店水上。乃通河南要道。

## 浮槎山

浮槎山在合肥縣東。梁武帝女爲尼於山。建道林寺。山頂有泉。味極甘美。歐陽修作記云。浮槎山在慎縣南三十五里。或曰浮閣山。或曰浮巢二山。其事出於浮圖老子之徒。荒怪誕幻之說。其上有泉。自前世論水者皆弗道。余嘗讀茶經。愛陸羽善言水。後得張又新水記。載劉伯芻李季卿所列水次第。以爲得之於羽。然以茶經考之。皆不合。又新妄狂險譎之士。其言難信。頗疑非羽之說。及得浮槎山水。然後益以羽爲知水者。浮槎與龍池山。皆在廬州界。

中較其水味。不及浮槎遠甚。而又新記以龍池爲第十。浮槎之水。棄而不錄。以此知其所失多矣。羽則不然。其論曰。山水上。江次之。井爲下。山水乳泉石池漫流者上。其言雖簡。而於論水盡矣。浮槎之水。發自李侯。嘉祐二年。李侯以鎮東軍留後。出守廬州。因遊金陵。登蔣山。飲其水。既又登浮槎。至其山上。有石池。涓涓可愛。蓋羽所謂乳泉漫流者也。飲之而甘。乃考圖記。問於父老。得其事迹。因以其水遺余於京師。余報之曰。李侯可謂賢矣。夫窮天下之物。無不得其欲者。富貴者之樂也。至於蔭長松。藉豐草。聽山溜之潺湲。飲石泉之滴瀝。此山林者之樂也。而山林之士。視天下之樂。不一動其心。或有欲於心。願力不可得而止者。乃能退而獲樂於斯。彼富貴者之能致物矣。而其不可兼者。惟山林之樂爾。惟富貴者之不得兼。然後貧賤之士。有以自足而高世。其不能兩得。亦其理與勢之然歟。今李侯生長富貴。厭於耳目。又知山林之爲樂。至於攀緣上下。幽隱窮絕。人所不及者。皆能得之。其兼取於物者。可

謂多矣。李侯折節好學。喜交賢士。敏於爲政。所至有能名。凡物不能自見。而待人以彰者有矣。其物未必可貴。而因人以重者亦有矣。故爲志其事。俾世知斯泉發自李侯始也。

### 梅山

梅山在舒城縣西。舊傳梅福棄官隱此。上有梅仙洞。又十里曰竹山。風景俱清秀如畫。梅福字子真。少勤學。博通羣籍。爲郡文學郎。補南昌尉。及王莽專政。福深惡之。一朝棄官而去。遨遊四海。傳以爲仙。其後人有見福於會稽者。變姓名爲吳市門卒云。

### 巢湖

巢湖形如凹字。東西百餘里。南北八十里許。一名焦湖。湖中有姥山孤山二嶼。景絕佳。

### 箏笛浦

箏笛浦在合肥縣城內后土廟側。昔有漁人宿旁。嘗聞箏笛之聲。傳是曹操載妓。船覆於此。

### 九華樓

九華樓在無爲縣南城上。宋米芾建。登其上。則見江西九華諸峯。屹然相向。故名九華。

### 偃月城

偃月城在無爲縣北。亦名濡須塢。吳孫權聞曹操來攻。中夾水立隄。狀如偃月。故名。

### 明遠臺

明遠臺在合肥縣城內西南隅。迴環皆水。中有一洲。相傳鮑明遠嘗讀書於臺上。

### 藏舟浦

藏舟浦在合肥縣西北。曹操與孫權藏戰艦於此。因名。浦內島嶼花竹。其境頗爲佳勝。

### 稻孫樓

稻孫樓在無爲縣城大安門上。宋米芾秋日登樓。宴集賓客。望見田禾青綠可愛。不知其名。乃詢諸老農。老農曰。是名稻孫。稻已刈獲。其根得雨。復抽餘穗。芾喜而名其樓。

### 周瑜墓

周瑜墓在廬江縣東十里。瑜字公瑾。舒人。程普嘗曰。與公瑾交。若飲醇酒。使人自醉。公瑾英達夙成。才兼文武。孫堅起兵討董卓時。徙家於舒。與瑜家爲隣。孫策與瑜同年。獨相友善。瑜推江南大宅以舍策。登堂拜母。有無相通。及策略定江東。瑜佐之。策倚爲左右手。親愛如舊。迨策弟權立。瑜輔之。破曹操於赤壁。以功拜前將軍。領南郡太守。瑜少精音律。或有缺誤。必顧之。故諺云。

曲有誤。周郎顧。

### 三 鳳陽

鳳陽在廬州之北。淮水之南。明太祖生長其地。地勢平坦。有山不高。西連汝潁。東走淮泗。爲江寧之項背。中原之腰膂。全恃長淮一水。爲其襟帶。形勢便利。有可戰可守之資。

### 八公山

八公山在壽縣南。漢淮南王安與賓客八公修煉於此。故名。晉謝元陳兵淝水。秦符堅望見八公山上草木皆兵。秦師遂大潰。

### 塗山

塗山在懷遠縣東南八里。淮河東岸。昔禹王會諸侯於塗山。執玉帛者萬國。卽此。

### 垓下

垓下在靈璧縣東南。楚項王軍垓下。漢軍及諸侯兵圍之數重。夜聞漢軍四面皆楚歌。大驚曰。漢皆已得楚乎。是何楚人之多也。起飲帳中。有美人名虞。常幸從。駿馬名騅。常騎之。乃悲歌慷慨。自作歌曰。力拔山兮氣蓋世。時不利兮騅不逝。騅不逝兮可奈何。虞兮虞兮奈若何。歌數闕。美人和之。項王泣數行下。左右皆泣。莫能仰視。

### 含桃閣

含桃閣在鳳陽縣城內。閣外舊有桃千章。宋梅詢爲守。呂夷簡爲倅。以此爲憇宴之地。

### 留犢亭

留犢亭在壽縣西。漢建安中時。苗爲縣令。之官乘車駕黃犢牛。後生一犢。去時留於此。

### 嗟虞墩



嗟虞墩在定遠縣南。虞姬墓俗稱嗟虞墩。靈璧縣東亦有墓。相傳靈璧葬其身。定遠葬其首。

#### 四 潁州

潁州在鳳陽之西。潁水之陰。春秋胡子國。秦屬潁川郡。漢屬汝南郡。三國魏置汝陰郡。後魏置潁州。東蔽亳壽。西出陳許。川澤流通。田疇沃衍。耕屯於此。兵食充足。

#### 九 九 仙 山

九仙山在霍邱縣南一百五十里。俗傳舊有九仙人。在此山中搗藥。因以爲名。

#### 十 聶 家 湖

聶家湖在太和縣西北。周圍五十餘里。菱芡蒲荷。徧植河中。水天一色。爲邑中之勝覽。

## 西湖

西湖在阜陽縣西北三里。長十里。廣二里。宋晏殊、歐陽修、蘇軾相繼爲守。皆嘗宴賞於此。詩酒山水之樂。論者與杭之西湖並稱。蘇軾有詩云。歲暮自急景。我閒方緩觴。歡飲西湖晚。步轉北渚長。地坐略少長。意行無澗岡。久知薺麥青。稍喜榆柳黃。盎盎春欲動。潏潏夜未央。水天鷗鷺靜。月露松檜香。撫景方晚晚。懷人重淒涼。豈無一老兵。坐念兩歐陽。我意正麋鹿。君材亦圭璋。此會不可再。此歡不可忘。

## 九龍井

九龍井在亳縣城南老子祠內。泉水久涸。唐開元二十九年。泉忽上湧。色極清。味極甘。

## 八角臺

八角臺在亳縣東南三里。臺高三丈。成八角形。相傳爲魏武帝所築。嘗大享

軍士於此。

聚星堂

聚星堂在阜陽縣治內。宋歐陽修守潁時建。名流觴集。極一時之風雅。蘇試有聚星堂詩并序。序云。元祐六年十一月一日。禱雨張龍公。得小雪。與客會飲聚星堂。忽憶歐陽文忠公作守時。雪中約客賦詩。禁體物語。於艱難中。特出奇麗。爾來四十餘年。莫有繼者。僕以老門生。繼公後。雖不足追配先生。而賓客之美。殆不減當時。公之二子。又適在郡。故輒舉前令。各賦一首。其詩云。窗前暗響鳴枯葉。龍公試手行初雪。映空先集疑有無。作態斜飛正愁絕。衆賓起舞風竹亂。老守先醉霜松折。恨無翠袖點橫斜。祇有微燈照明滅。歸來尙喜更鼓永。晨起不待鈴索掣。未嫌長夜作衣稜。却怕初陽生眼纈。欲浮大白追餘賞。幸有回飈驚落屑。模糊檜頂獨多時。歷亂瓦溝裁一瞥。汝南先賢有故事。醉翁詩話誰續說。當時號令君聽取。白戰不許持寸鐵。

## 會老堂

會老堂在阜陽縣西湖上。宋歐陽永叔與趙叔平同在政府。相得甚歡。及叔平歸睢陽。單車訪永叔。時年八十矣。呂晦叔爲穎守。開宴二公。賓主稱一時之盛。題其堂曰會老。

## 雙柳亭

雙柳亭在阜陽縣署內。宋晏殊守穎。嘗手植雙柳。至歐陽修爲令。雙柳成陰。因建此亭。

## 五 泗州

泗州在鳳陽東北。地跨洪澤湖。川原平曠。水陸交通。爲梁宋吳楚之衝要。齊魯汴洛之要道。其城瀕汴河北岸。汴東流入洪澤。南流入天井湖。州之舊城。清初淪入洪澤湖。

## 紅山

紅山在天長縣城西北隅。山有土壁。日光掩映。赤色殷然。鮮明如胭脂。俗呼爲胭脂山。

### 掛劍臺

掛劍臺在泗縣北一百二十里。安湖西岸。昔季札過徐。徐君愛延陵季子之劍。季子知而未與。及季子復來。徐君已歿。乃解劍掛於徐君墓前之樹間。以重信義。後人於其地建臺。臺西有徐君墓。

### 望夫石

望夫石在天長縣西南。相傳有女子望夫不歸。日夜登臨。死於石下。唐王建望夫石詩云。望夫處。江悠悠。化爲石。不回頭。山頭日日風和雨。行人歸來石應語。後人於其地建臺。名曰望夫臺。蘇軾望夫臺詩云。山頭孤石遠亭亭。江轉船回石似屏。可憐千古長如昨。船去船來自不停。浩浩長江赴滄海。紛紛過客似浮萍。誰能坐待山月出。照見寒影高伶俜。

## 翠屏堂

翠屏堂在盱眙縣東玻璃泉上。前控龜山。下臨長淮。水光山色。景物絕佳。宋陸游有記。

## 六安

六安古六國。周封臯陶之後於此。漢初英布爲淮南王都六。卽此。布滅。改六安國。晉爲六安縣。唐置霍州。宋復爲六安縣。元爲六安州。層嵐重壑。皆霍山之脈所延長。惟北面傾斜。塗通亳壽。有淝河。向北流經其城西。

## 英山

英山在英山縣東。山高峯秀。爲羣山冠。山上有古井。嘗有五色瑞雲。山麓有漢英布墓。英布少時。有客相之曰。當刑而王。及壯。坐黥。因改姓黥。秦末以兵屬項梁。項羽封爲九江王。後因酈食其之說。歸漢。佐高祖。定天下。封淮南王。嗣以韓信彭越見誅。懼禍及已。發兵拒命。高祖討平之。

### 霍山

霍山在霍山縣西北。卽天柱山之一脈。層峰疊岫。雄奇秀拔。皮日休所謂與地角壯。與天掠勢者也。漢武帝祀嶽神於此。巔有天池。龍湫。試心崖等勝蹟。英霍之間。高嶂虧雲。森林隱日。泉石之勝。搜討莫窮。而襟帶蘄黃。肘腋光蔡。出奇走險。不十日而震動中原。清咸豐末。鮑超一軍。爲陳玉成困於山中。金國琛深入援之。力戰破圍。是則近世兵家所當注意者焉。

### 瀟臺

瀟臺在霍山縣威遠門外。突兀中流。石狀如臺。有觀瀾亭。下臨大江。石壁鐫小赤壁三字。

### 玉虹泉

玉虹泉在英山縣東英山西北。石壁上鐫玉虹泉三字。旁有石碑。刻往來遊人題詠。

## 七 滁·州

滁州在廬州之東北。滁水之陽。山高水清。爲江淮間之勝地。其城跨小沙河。上羣山圍環如玦。獨缺其西南一角。有清流關適當其缺。扼江淮之衝途。古時視爲兵爭要地。

### 瑯琊山

瑯琊山在滁縣西南十里。晉瑯琊王嘗駐此。因名。峯巒林壑。秀麗偉拔。爲淮東奇觀。下有瑯琊溪。世謂之醴泉。宋歐陽修有記云。西南諸峯林壑尤美。望之蔚然而深秀。

### 龍蟠山

龍蟠山在滁縣南山。皆峭壁。立石爲門。上有虎跑泉、桃花澗、偃月洞。洞側刻名人題詠。

### 懷嵩樓



懷嵩樓在滁縣城內。一名北樓。又名贊皇樓。唐李德裕貶滁時建。取懷歸嵩洛之意。

### 醉翁亭

醉翁亭在滁縣西南琅琊山釀泉之側。宋歐陽修嘗飲觴醉樂於其間。作醉翁亭記曰。環滁皆山也。其西南諸峯。林壑尤美。望之蔚然而深秀者。琅琊也。山行六七里。漸聞水聲潺潺。而瀉出於兩峯之間者。釀泉也。峯回路轉。有亭翼然臨於泉上者。醉翁亭也。作亭者誰。山之僧智仙也。名之者誰。太守自謂也。太守與客來飲於此。飲少輒醉。而年又最高。故自號曰醉翁也。醉翁之意不在酒。而在乎山水之間也。山水之樂。得之心而寓之酒也。若夫日出而林霏開。雲歸而巖穴暝。晦明變化者。山間之朝暮也。野芳發而幽香。佳木秀而繁陰。風霜高潔。水落而石出者。山間之四時也。朝而往。暮而歸。四時之景不同。而樂亦無窮也。至於負者歌於塗。行者休於樹。前者呼。後者應。僂僂提携。

往來而不絕者。滁人遊也。臨溪而漁。溪深而魚肥。釀泉爲酒。泉香而酒冽。山肴野蔌。雜然而前陳者。太守宴也。宴酣之樂。非絲非竹。射者中。奕者勝。觥籌交錯。坐起而誼譁者。衆賓懽也。蒼顏白髮。頽乎其中者。太守醉也。已而夕陽在山。人影散亂。太守歸而賓客從也。樹林陰翳。鳴聲上下。遊人去而禽鳥樂也。然而禽鳥知山林之樂。而不知人之樂。人知從太守遊而樂。而不知太守之樂其樂也。醉能同其樂。醒能述以文者。太守也。太守謂誰。廬陵歐陽修也。

### 茶仙亭

茶仙亭在琅琊山。宋時琅琊僧爲州守曾鞏建。其命名取杜牧詩。誰知病太守。猶得作茶仙之句。

### 清流關

清流關在滁縣西。後周末。趙匡胤破南唐。李景兵十五萬。生擒其將皇甫暉。姚鳳於此。

## 八 和州

和州在滁州南。襟江帶山。天然形勢。南有梁山。矗立江干。與當塗之博望山對峙如門。俗稱東西梁山。爲江上用兵最要地。麻湖諸水。灑爲牛屯河。環繞州城。東南分道入江。

### 烏江浦

烏江浦在和縣東北四十里。項羽自垓下潰圍而出。至東城。從者僅二十八騎。欲東渡烏江。烏江亭長檣舟以待。曰：江東雖小。地方千里。亦足王也。願大王急渡。羽疑其詐。笑曰：籍與江東子弟八千人。渡江而西。今無一人還。縱江東父兄憐而王我。我獨不愧於心乎。乃自刎而死。

### 漁邱渡

漁邱渡在和縣。伍子胥奔吳。追者在後。至江干。有一漁父乘船。知子胥之急。乃渡子胥。子胥旣渡。解劍以贈漁父。漁父曰：楚國之法。得伍胥者。賜爵執珪。

豈徒百金劍耶。不受。當將渡時。漁父作歌三章。首章云。白日昭昭兮。寢已馳。與子期乎蘆之碕。次章云。日已夕兮。予心憂悲。月已馳兮。何不渡爲。事寢急兮。將奈何。末章云。蘆中人。蘆中人。豈非窮士乎。歌詞前舒緩而後激切。頗深顧惜之意。

### 鎮淮樓

鎮淮樓在和縣城內。高臺層樓。雕製樸古。明太祖駐蹕於此。曾與諸將飲酒賦詩其上。

### 水心亭

水心亭在和縣城內三老堂前。唐張籍詩送客將過沙口堰。看花多上水心亭。卽詠此。

### 清風樓

清風樓在和縣西南城隈峨嵋墩下。宋元祐間。名爲連雲觀。後改今名。宋蔡

襄有詩。

### 張籍宅

張籍宅在和縣城通淮門內。有光孝寺。爲張籍故宅。城南五里。曰桃花隴。爲籍讀書處。籍字文昌。善古詩及書翰。行草。舉進士。授水部員外郎。遷國子司業。性情耿直。不容物。是時韓愈以文衡輕重天下士。而籍爲愈客。且薦於朝。自是名播人口。當時賢士爭慕之。

### 九池州

池州春秋屬吳。後屬越。戰國屬楚。漢屬丹陽。隋曰秋浦。唐宋皆爲池州。明爲池州府。在安慶府東。據揚子江南岸。地常騶山山脈之陰。土多磽确。泉水甘冽。瀕江地味稍腴。

### 九華山

九華山在青陽縣西南。上有九峯。千仞壁立。舊名九子山。唐李白以九峯如

蓮花削成。因改爲九華山。劉禹錫亦稱其九峯競秀。神采奇異。明王守仁讀書山中。悟良知之理。

### 秋浦

秋浦在貴池縣西南。長八十餘里。濶約三里。四時景物。宛若瀟湘洞庭之間。風致清絕。

### 菊江亭

菊江亭在東流縣菊江門外。舊有菊臺。瀕大江。後建樓其上。名曰望江。內祀晉陶淵明。蓋東流縣本漢彭澤縣地。淵明爲彭澤令時。性愛菊。所至之處。徧植之。故彭澤有菊邑之稱。

### 金雞石

金雞石在建德縣草堂寺之北。羅隱嘗過此。戲題曰。金雞不向五更啼。石遂迸裂如劈。

## 十 寧國

寧國在池州府之東。地勢當黟山北脈。起頂爲陵陽。敬亭、九華、柏枧諸秀峯。水則有青弋江、宛溪。青弋江爲大。山水之勝。甲於東南。故六朝時風流朝貴。多求出守於此郡。

### 隱雨巖

隱雨巖在涇縣東北二十里。琴高山上。泉石奇秀。相傳漢時處士琴高。嘗隱居於巖下。

### 敬亭山

敬亭山在宣城縣北。山上舊有敬亭。卽謝朓登遊賦詩之處。唐李白敬亭山詩云。衆鳥高飛盡。孤雲獨去閒。相看兩不厭。只有敬亭山。又謝公亭詩云。謝公離別處。風景每生愁。客散青天外。山空碧水流。池花春映日。窗竹夜鳴秋。今古一相接。長歌懷舊遊。

## 疊嶂樓

疊嶂樓卽北樓。在宣城縣城內。南齊時郡守謝朓建。唐李白詩。江城如畫裏。山曉望晴空。兩水夾明鏡。雙橋落彩虹。人煙寒橘柚。秋色老梧桐。誰念北樓上。臨風懷謝公。故後人亦稱爲謝公樓。成通年間。宣城刺史獨孤霖。改其名曰疊嶂。并自爲之記。

## 甘公城

甘公城在南陵縣北。爲吳將甘寧所築。甃壁甚堅。中可容千人。繞以漳水。今門址猶存。甘寧字興霸。少有勇力。好游俠。仕吳。爲孫權將。善計略。尤輕財敬士。嘗從周瑜拒曹操於烏林。攻曹仁於南郡。屢立戰功。時稱江表虎臣。官至折衝將軍。及卒。權痛惜之。

## 萬卷堂

萬卷堂在寧國縣南三十里。宋楊秉讀書處。其故人湯鵬舉遺以國子監書。



籍。珍藏其中。

### 六勸亭

六勸亭在太平縣東南五里。宋治平初周景賢建。作文勸民。其條有六。一行孝弟。二務農桑。三尊儒學。四興廉遜。五崇信行。六明醫藥。因名亭曰六勸。

### 十一 太平

太平在寧國府之北。西瀕於揚子江之東。江水爲東西梁山所束縛。江面驟窄。其下游之采石磯。尤爲通津。地勢當黟山之脈。北走入境。高度漸降。其東西之地。最爲平衍。

### 青山

青山在當塗縣東南三十里。一名謝公山。林壑秀美。謝眺嘗築室於此。唐李白至姑孰。悅謝家青山。欲終老焉。

### 龍山

龍山在當塗縣南。孟嘉爲桓溫幕賓。九月九日。桓溫宴佐吏於龍山。有風吹嘉帽落地。嘉不之覺。溫使左右勿言。欲觀其舉止。良久。嘉如廁。溫令取還之。命孫盛作文嘲嘉。著嘉坐處。嘉還。見卽答之。其文甚美。四座嗟嘆。

### 白紵山

白紵山在當塗縣東五里。本名楚山。桓溫携妓登此。奏白紵歌。因改名。按晉白紵歌有二首。其一云。輕軀徐起徐洋洋。高舉兩手白鶴翔。宛若龍轉乍低昂。凝停善睐容儀光。如推若引留且行。隨世而變誠無方。舞以盡神安可忘。晉世方昌樂未央。質如輕雲色如銀。愛之遺誰贈佳人。制以爲袍餘作巾。袍以光軀巾拂塵。麗服在御會嘉賓。醪醴盈樽美且淳。清歌徐舞降祇神。四座歌樂胡可陳。其二云。陽春白日風花香。趨步明月舞瑤璫。聲發金石媚笙簧。羅袿徐轉紅袖揚。清歌流響繞鳳梁。如矜若思凝且翔。轉眄遺精艷輝光。將流將引雙雁行。歡來何晚意何長。明君御世永歌昌。

### 九井山

九井山在當塗縣南。上有九井。世傳桓溫所鑿。殷仲文九日從桓溫登高賦詩於此。

### 燃犀亭

燃犀亭在當塗縣西北牛渚磯上。晉溫嶠至牛渚。聞水中有聲。燃犀燭之。後人因建亭。

### 捉月亭

捉月亭在采石磯上。世傳李白夜渡采石。酒性狂發。從水中捉月。後人因以名亭。梅堯臣詩云。采石月下逢謫仙。衣被錦袍坐釣船。醉中愛月江底懸。以手弄月身翻然。

### 白馬山

白馬山在蕪湖縣西南二十五里。上有三聖祠。下有紫燕洞。洞深莫測。故稱

白馬洞天。

### 赭山

赭山在蕪湖縣西北五里。巖石蒼古。赤色殷然。故稱爲赭嶺晴嵐。爲蕪湖八景之一。

### 大荆山

大荆山在蕪湖縣東南十六里。卞和得玉於此。明許用中書寒壁二字於巖。故稱荆山寒壁。

### 蠓磯

蠓磯在蕪湖縣隔江。右有石穴。廣一丈。深莫測。相傳爲蠓所居。其上有靈澤夫人祠。

### 留春園

留春園在蕪湖縣陶塘東。爲李氏私產。其地兩岸垂楊。風景絕佳。與西湖蘇

堤相彷彿。

### 滴翠軒

滴翠軒在蕪湖縣赭山北廣濟寺內。舊名檜軒。宋黃山谷讀書處。清光緒年間重修之。

## 十二 徽州

徽州在寧國府之南。春秋屬吳。戰國屬楚。漢爲丹陽郡。唐曰歙州。宋曰徽州。明爲徽州府。當黟山山彙。地勢陡絕。黟山古稱三天子幘。其高秀爲南嶺之冠。

### 白嶽山

白嶽山在休寧縣西四十里。奇峯層列。絕壁峭拔。隱隱有飛動之勢。其西北爲齊雲嶺。上有天門石室。珠簾泉。香爐峯。垂蓮洞。仙人谷。芙蓉石。落星巖。諸勝。世人稱爲小武當。

## 靈巖洞

靈巖洞在婺源縣黃山上。其東北曰慶雲洞。西曰蓮花洞。南曰含虛洞。皆爲佳景勝地。

## 小桃源

小桃源在黟縣北。一名樵貴谷。昔有樵者入山采薪。行數里。得一穴。豁然清曠。中有十餘家。云是秦時避亂於此。世稱爲小桃源。唐李白詩。地多靈草木。人尙古衣冠。卽指此。

## 任公溪

任公溪在歙縣昉村。俗傳任昉爲新安太守。行春至此。愛其雲溪綠源。尋幽累日不返。百姓因名其溪爲昉溪。溪旁村爲昉村。大中十年。刺史盧藩改其名曰任公溪。任公村。

## 李白釣臺

李白釣臺在黟東南。西連墨嶺。東臨潯陽。右山左水。風景絕勝。一名潯陽臺。相傳李白嘗遊釣於臺下。曾有詩云。磨盡石嶺墨。潯亭釣赤魚。靄峯尖似筆。堪畫不堪書。

### 文公闕里

文公闕里在婺源縣南。卽朱文公先世故居。爲元時知州于文傳所建。其南爲朱氏家廟。階前有韋齋井。文公之父所鑿。相傳文公生時。井中現紫氣。數日不散。亦名虹井。

### 黃墩

黃墩在歙縣西。晉新安太守黃積卒於官。子孫家此。故名。梁程靈洗。唐朱師古。皆居此。

### 翠眉亭

翠眉亭在績溪縣西。亭前小山相對如眉。宋蘇軾嘗流連於此。謂似其鄉之

眉山故名。

### 十三 廣德

廣德在寧國府之東。爲古桐汭地。漢曰廣德。明改爲州。地勢多山。兵事上視。爲江浙要衝。有汭水挾衆溪斜貫其間。灘多水淺。不利舟楫。

#### 竹山

竹山在廣德縣南。疊嶂層巒。雄秀清麗。巖壑深奇。有松竹泉石之勝。每春時遊人極盛。

#### 靈山

靈山在廣德縣南。中峯有靈山寺。水從石隙流出。狀如珠簾。名珠簾泉。下爲丁公潭。雲錦泉。有兩巨石相對峙。名支機石。石梁橫臥。瀑布數十丈。傾瀉下注。爲山中之奇觀。

#### 桃姑洞



桃姑洞在廣德縣東北五十里。洞門在半山中。內有數洞相通。至第七洞頂門一竇。日光融照。俗呼爲天井。

### 范公亭

范公亭在廣德縣城內。宋范仲淹爲司理。折獄得其平。後人因以名亭。其西有景范亭。



# 中華名勝古蹟目錄

## 第九編 江西

### 一 南昌……………一一九

西山 松門山 百丈山 清水巖 秦人洞 百花洲 石頭津 滕王閣 洗馬

池 蓼洲 君子巷 南浦亭 寧王府 青雲圃 大安寺 澹臺墓 徐孺子墓

### 二 南康……………九一一〇

廬山 神龍宮 娑羅樹 御碑亭 佛手崖 犁頭尖 三峽水 棲賢寺 玉淵

金井 秀峯寺 萬杉寺 青玉峽 香爐峰 雙劍峰 歸宗寺 洗墨池 五

老峯 白鹿洞 朱文公祠 三疊泉 溫泉 石壁山 冰玉堂 愛蓮堂 喚渡

亭 漱玉亭 臥龍庵 壽禧亭 掛劍松

### 三 九江……………二〇一—二七

延枝山 石鐘山 擲筆峰 庾樓 五柳館 三笑亭 琵琶亭 墨竹亭 浸月亭 牯牛嶺 黃龍峽 滴水石

四 饒州……………二七—三一

芝山 石虹山 梅巖 清澗 石城巖 延賓坊 五老亭 飽山閣 蜀錦亭 止水亭

五 廣信……………三一—三四

玉山 龍虎山 靈山 相公府 石室 稼軒

六 撫州……………三四—三六

靈谷山 繡經臺 玉茗亭 三山小隱 王右軍宅 魏夫人壇

七 建昌……………三六—三八

麻姑山 壺公巖 軍山 照碧亭 平遠臺 識舟亭

八 臨江……………三八—三九

玉潤 吟峰 戲魚堂 近江樓

九 吉安……………三九—四一

青原山 芙蓉山 快閣 寒江亭 二友堂 姚崇石室

十 贛州……………四一—四三

螺亭石 鬱孤臺 濂溪閣 八境臺 翠玉樓 章貢臺

十一 南安……………四三—四五

大庾嶺 陳公臺 揖秀亭 綠陰亭

十二 寧都……………四五—四六

灰山 魚骨潭 熙熙亭 凌雲亭

十三 瑞州……………四六—五〇

黃蘗山 鈞山 珠湖 梅福宅 康樂城 東軒 碧落堂 相公堆

十四 袁州……………五〇—五三

---

中華名勝古蹟 第九編 目錄

四

宜春臺 化成殿 袁山 玉女峰 楊岐山 飛泳樓 需冥亭 羅漢松

# 中華名勝古蹟

## 第九編 江西

### 一 南昌

南昌府在鄱陽湖西南。本漢豫章郡。晉爲江州。唐爲洪都。南唐建都於此。名曰南昌府。地勢多山。東南一面斜向鄱陽湖。衍平低溼。贛水縱貫其間。東挾盱江。西挾瑞河。脩水至吳城鎮之東北。中間支渠數十道。泄入鄱陽湖。城瀕贛江東岸。

### 西山

西山在新建縣西門外。峯岫聳翠。樹木叢幽。巖石蒼奇。泉林清秀。峯之雄峻者曰大蕭。小蕭。二峯。蕭史所嘗遊也。峯之尖削者曰葛仙峯。下有泉源。曰葛仙源。葛洪所嘗憩也。嶺之最高者曰鶴嶺。王仙跨鶴所也。曰梅嶺。梅福學道。

處也。有岡環抱曰鸞岡。洪崖先生乘鸞而來。棲止於此也。隱士高人之遺蹟。搜討莫窮。世故稱爲洞天福地焉。

### 松門山

松門山在新建縣北。兩崖蒼松茂鬱。自遠望之。天然門戶。山上有石鏡。其光可照人毫髮。

### 百丈山

百丈山在奉新縣西。巖上有清泉倒出。飛下千尺。故名。唐宣宗嘗潛遊至此。賦詩以爲樂。

### 清水巖

清水巖在義寧縣東北。南巖有石室。北巖多蘭蕙。巖前有石絕巨。黃山谷稱爲天下勝處。

### 秦人洞

秦人洞在新建縣西。嘗有人秉炬入洞。行五里許。豁然開朗。一水橫絕。遙望桑麻芄芄。若有居室。

### 百花洲

百花洲在新建縣東湖畔。畫欄紅橋。風景清幽。攬全湖之勝。舊有蘇公圃。冠鰲亭滄浪亭諸勝。宋紹興中。張澄建講武亭於洲上。練習水軍於此。

### 石頭津

石頭津在新建縣西北。一名沈書浦。殷洪喬拜豫章太守。都下縉紳多致書囑託。洪喬行次石頭津。皆擲於水中。曰。沈者自沈。浮者自浮。殷洪喬不作寄書郵。其性耿介如此。

### 滕王閣

滕王閣在新建縣章江門外。唐高祖子元嬰爲洪州刺史。建此閣。後封滕王。故名。咸淳二年。閻伯嶼爲洪州牧。重修之。九月九日。宴賓僚於閣。欲誇其壻。



吳子章才。令宿構序。時王勃省父次馬當山。去南昌七百餘里。夢水神告其故。且許助風。及明抵南昌。遂得預宴。酒酣。閻請衆賓作序。皆辭謝。獨王勃不辭。閻怒。起更衣。密令吏得句。卽報。至落霞二句。嘆曰。此天才也。遂請成文。極權罷。勃序曰。南昌故郡。洪都新府。星分翼軫。地接衡廬。襟三江而帶五湖。控蠻荆而引甌越。物華天寶。龍光射牛斗之墟。人傑地靈。徐孺下陳蕃之榻。雄州霧列。俊彩星馳。臺隍枕夷夏之交。賓主盡東南之美。都督閻公之雅望。棨戟遙臨。宇文新州之懿範。櫺帷暫駐。十旬休暇。勝友如雲。千里逢迎。高朋滿座。騰蛟起鳳。孟學士之詞宗。紫電清霜。王將軍之武庫。家君作宰。路出名區。童子何知。躬逢勝餞。時維九月。序屬三秋。潦水盡而寒潭清。煙光凝而暮山紫。儼驂馱於上路。訪風景於崇阿。臨帝子之長洲。得仙人之舊館。層巒聳翠。上出重霄。飛閣流丹。下臨無地。鶴汀鳧渚。窮島嶼之縈迴。桂殿蘭宮。列岡巒之體勢。披繡闥。俯雕甍。山原曠其盈視。川澤盱其駭矚。閻闔撲地。鐘鳴鼎食。

之家。舸艦迷津。青雀黃龍之軸。虹霄雨霽。彩徹雲衢。落霞與孤鶩齊飛。秋水共長天一色。漁舟唱晚。響窮彭蠡之濱。雁陣驚寒。聲斷衡陽之浦。遙吟俯暢。逸興遄飛。爽籟發而清風生。纖歌凝而白雲遏。睢園綠竹。氣凌彭澤之樽。鄴水朱華。光照臨川之筆。四美具。二難并。窮睇眄於中天。極娛遊於暇日。天高地迥。覺宇宙之無窮。興盡悲來。識盈虛之有數。望長安於日下。指吳會於雲間。地勢極而南溟深。天柱高而北辰遠。關山難越。誰悲失路之人。萍水相逢。盡是他鄉之客。懷帝閭而不見。奉宣室以何年。嗚呼。時運不齊。命途多舛。馮唐易老。李廣難封。屈賈誼於長沙。非無聖主。竄梁鴻於海曲。豈乏明時。所賴君子安貧。達人知命。老當益壯。寧知白首之心。窮且益堅。不墜青雲之志。酌貪泉而覺爽。處涸轍以猶懽。北海雖賒。扶搖可接。東隅已逝。桑榆非晚。孟嘗高潔。空懷報國之心。阮籍猖狂。豈效窮途之哭。勃三尺微命。一介書生。無路請纓。等終軍之弱冠。有懷投筆。慕宗慤之長風。舍簪笏於百齡。奉晨旨於萬

里非謝家之寶樹。接孟氏之芳鄰。他日趨庭。叨陪鯉對。今晨捧袂。喜托龍門。楊意不逢。撫凌雲而自惜。鍾期既遇。奏流水以何慚。嗚呼。勝地不常。盛筵難再。蘭亭已矣。梓澤邱墟。臨別贈言。幸承恩於偉餞。登高作賦。是所望於羣公。敢竭鄙誠。恭疏短引。一言均賦。四韻俱成。滕王高閣臨江渚。佩玉鳴鸞罷歌舞。畫棟朝飛南浦雲。珠簾暮捲西山雨。閒雲潭影日悠悠。物換星移幾度秋。閣中帝子今何在。檻外長江空自流。

### 洗馬池

洗馬池在新建縣城內文子祠內。漢灌嬰定豫章。飲馬於此。池旁有石刻洗馬池三字。

### 蓼洲

蓼洲在新建縣廣潤門外。卽古鞠轆洲。相傳呂蒙作句鹿大艚處。秋時花開。景絕幽勝。

君子巷

君子巷在蓼洲上。宋有李生者。好善樂施。里人賴之。有寇來。生迎官軍破之。因以名巷。

南浦亭

南浦亭在新建縣廣潤門外。後改爲南浦驛。下瞰南浦。別賦云。送君南浦。傷如之何。卽此。

寧王府

寧王府在新建縣城內。卽今省長公署。頭門有端表樓三字。相傳爲寧王表奏繕寫之所。或謂爲王妃梳洗之樓。二門有匾額一方。裝漆絕古。書屏翰兩字。相傳爲婁妃手題。

青雲圃

青雲圃在新建縣南十五里許。周王子晉所築。漢梅子真亦嘗隱此。圃中花

木極盛。

### 大安寺

大安寺在寧王府後。初名東寺。殿前有鼎。古色斑斕。有鐵香爐。高六尺。爲赤烏元年造。

### 澹臺墓

澹臺墓在新建縣東湖上。相傳澹臺滅明南遊。居於江干。及卒。遂葬於此。墓門有巨石。

### 徐孺子墓

徐孺子墓在新建縣進賢門外十里。墓前石碑。刻隸書漢南州高士徐孺子之墓十字。徐孺子名穉。孺子其字也。家貧。常自耕稼。非其力不食。恭儉義讓。所居人服其德。太守陳蕃特設榻以禮之。累舉皆不就。築室隱居。時稱南州高士。郭林宗母喪。致生芻一束於廬門而去。林宗曰。此必徐孺子也。詩云。生

芻一束。其人如玉。吾無德以當之。漢桓帝安車徵之。不就。遂終老於野。

## 二 南康

南康在南昌府之北。西負匡廬。東跨鄱陽。山川雄秀。兵事上視爲險要。城瀕鄱陽湖西岸。劉裕敗盧循。明太祖敗陳友諒。王守仁破宸濠。太平軍困曾國藩。皆在於此。

## 廬山

廬山在南康府城西北。亦名匡廬。周匡裕遜世隱居。結廬於此。因名。秦盧敖遜跡山中。遂名廬山。北瞰大江。西臨彭蠡。昔人評爲博。大。雄。奇。四字。足以括之。峰巒橫潰。各爲尊高。四時之際。煙雲蔽虧。不可方物。古今來文人墨客。竭其才華。詠歌抒寫。終無以盡其妙。唐李白廬山謠寄盧侍御虛舟詩云。我本楚狂人。鳳歌笑孔丘。手持綠玉杖。朝別黃鶴樓。五岳尋山不辭遠。一生好入名山遊。廬山秀出南斗傍。屏風九疊雲錦張。影落名湖青黛光。金闕前開二

峯長。銀河倒挂三石梁。香爐瀑布遙相望。迴崖沓嶂凌蒼蒼。翠影紅霞映朝日。鳥飛不到吳天長。登高壯觀天地間。大江茫茫去不還。黃雲萬里動風色。白波九道流雪山。好爲廬山謠。興因廬山發。閒窺石鏡清我心。謝公行處蒼苔沒。早服還丹無世情。琴心三疊道初成。遙見仙人彩雲裏。手把芙蓉朝玉京。先期汗漫九垓土。願接盧敖遊太清。蘇軾初入廬山五絕三首。詩云。青山若無素。偃蹇不相親。要識廬山面。他年是故人。自昔懷清賞。神遊杳靄間。如今不是夢。眞箇是廬山。芒屨青竹枝。自挂百錢游。可怪深山裏。人人識故侯。又過廬山下。詩云。雲亂欲羶山。勢與飄風南。羣儕相應和。勇往爭驂驪。可憐蒼蔚中。時出紫翠嵐。雁沒失東嶺。龍騰見西龕。一時供坐笑。百態變立談。暴雨破塊圪。清飈掃渾酣。廓然歸何處。陋矣安足戡。亭亭紫霄峯。窈窕白石庵。五老數松雪。雙溪落天潭。雖云默禱應。願有移文慙。

神龍宮

神龍宮在廬山頂將軍峯西遂谷中。其地巖壑幽深。一瀑短而肥。注入碧澗。清淺宜浴。

### 娑羅樹

娑羅樹在廬山黃龍寺前。寺門外有娑羅樹二株。直幹疏枝。扶搖可愛。爲千  
年前古物。相傳自西域移來者。

### 御碑亭

御碑亭在廬山之岡。亭橫跨道上。亭內度明太祖製周顛仙碑。其臺曰白鹿  
昇仙臺。

### 佛手崖

佛手崖在御碑亭東北。一曰仙人洞。高可二丈。深廣各四五丈。最深處有泉  
一泓極清。

### 犁頭尖



犁頭尖在廬山太乙峯之南。一名小太乙峯。奇峯三四。尖鋒銳利。其形似犁。故名犁頭。

### 三峽水

三峽水在棲賢寺前。凡含鄱口東西諸水。大小支流。皆注於此。故洶湧騰躍。勢不可遏。蘇軾棲賢三峽橋詩。吾聞太山石。積日穿綫溜。況此百雷霆。萬石與石鬪。深行九地底。險出三峽右。長輸不盡溪。欲滿無底竇。跳波翻潛魚。震響落飛狖。清寒入山骨。草木盡堅瘦。空濛煙靄間。瀕洞金石奏。彎彎飛橋出。激激半月殼。玉淵神龍近。雨雹亂晴晝。垂鉞得清甘。可嚙不可漱。

### 棲賢寺

棲賢寺在廬山南部。爲五大叢林之一。相傳唐李渤讀書於此。寺前林木清秀。景致佳絕。

### 玉淵

玉淵在三峽水之下流。平地溜瀉數十丈。陷爲潭。既溢。奔騰數百步外。復陷爲潭。如是者可七八處。潭面石激於水。皆凹滑。縱足則溜。水直下數折。過三峽橋。俗稱爲觀音橋。

### 金井

金井在三峽橋之下。玉淵之水。直注於橋下。潭水清瑩澄澈。夾岸巨石叢莽。咸有怒態。

### 秀峯寺

秀峯寺在廬山鶴鳴峯下。峯有二瀑布。立寺前縱觀。景物最爲奇麗。爲五大叢林之一。

### 萬杉寺

萬杉寺在廬山南。爲五大叢林之一。寺前多古樟。有五幹者。俗稱五爪樟。皆爲梁時物。

青玉峽

青玉峽在秀峯寺前。石碧而削。水色瑩潔。其潭曰龍池。其斜坡鑄古今名人題字無數。

香爐峯

香爐峯在鶴鳴峯之右。峰爲雲掩。不常見。蘇軾詩。長安自不遠。蜀客苦思歸。莫教名障日。喚作小峨眉。

雙劍峯

雙劍峯在鶴鳴香爐二峯之間。雙峯並列。尖削上插。其形似劍。左右有二瀑。望之如練。蘇軾詩。帝遣銀河一派垂。古來惟有謫仙詞。飛流濺沫知多少。不與徐凝洗惡詩。

歸宗寺

歸宗寺在廬山西南盡處。爲五大叢林之一。寺後有塔。歷劫不壞。相傳有會

利藏其中。

### 洗墨池

洗墨池在歸真寺內。相傳寺爲王右軍故宅。殿前有洗墨池。水色深黑。終歲不涸不盈。

### 五老峯

五老峯在廬山東南。五峰如偶立。上有雲氣。隱現無定。下有海會寺。爲五大叢林之一。蘇軾詩。偶尋流水上崔嵬。五老蒼顏一笑開。若見謫仙煩寄語。康山頭白好歸來。

### 白鹿洞

白鹿洞在廬山東南五老峯下。唐李渤隱居於此。常蓄一白鹿於洞中。以爲娛樂。故名。有白鹿洞書院。宋時爲四大書院之一。爲朱陸諸儒講學之所。清季改爲農林學校。

朱文公祠

朱文公祠在白鹿洞書院之左。內供文公像。文公知南康軍。闢舍置田。曾講學於其中。

三疊泉

三疊泉爲廬山奇勝處。其泉源發自大月峯。由五老峯背東下。裊裊如垂練。懸注大磐右。既激大磐石。摧碎散落。至第二大磐石。滙爲洪流。下注深谷。其聲轟轟然。如萬人鼓。

溫泉

溫泉在廬山西南曠野間。其地距廬山約三十丈。煮雞子。僅需十三分鐘。則微凝可食。蘇軾詩序云。余過溫泉壁上。有詩云。直待衆生總無垢。我方清冷混常流。亦作一絕曰。石龍有口口無根。自在流泉誰吐吞。若信衆生本無垢。此泉何處覓寒溫。

## 石壁山

石壁山在都昌縣西南。前臨大江。有石屹立。截然如壁。謝靈運嘗居於此。有石壁精舍。

## 冰玉堂

冰玉堂在南康縣舊府署後。爲劉渙故居。蘇軾嘗稱其冰清玉潔。後人因以名堂。劉渙字凝之。剛直不喜逢迎。棄官歸隱廬山之陽。歐陽修與公同年。高其清節。爲賦廬山詩贈之。朱文公守南康。爲作壯節亭記。渙隱處三十載。蕭然四壁。號西澗先生。

## 愛蓮堂

愛蓮堂在南康縣舊府署內。宋周茂叔性愛蓮。有愛蓮說。堂前有愛蓮池。爲茂叔所鑿。宋周敦頤字茂叔。別號濂溪先生。濂溪有舊橋。上有水亭。先生嘗釣遊其中。吟風弄月。意味灑然。窗前草不令除去。言與自己意思一般。其愛

蓮說云。草木之花。可愛者甚繁。予獨愛蓮之出污泥而不染。濯清漣而不妖。中通外直。不蔓不支。香遠益清。亭亭淨植。可遠觀而不可玩褻焉。誠花中之君子也。

### 喚渡亭

喚渡亭在建昌縣南修水之旁。唐白居易遷謫江州司馬時。嘗過此。賦詩曰。建昌江水縣門前。立馬教人喚渡船。後人因摘此二字以名亭。

### 漱玉亭

漱玉亭在廬山開先寺後。瀑布泉注於龍湫。縈流經此。環繞亭前。有如漱玉。故名。蘇軾開先漱玉亭詩云。高巖下赤日。深谷來悲風。劈開青玉峽。飛出兩白龍。亂沫散霜雪。古潭搖清空。餘流滑無聲。快瀉雙石碣。我來不忍去。月出飛橋東。蕩蕩白銀闕。沈沈水精宮。願隨琴高生。腳踏赤繡公。手持白芙蕖。跳下清冷中。

## 臥龍庵

臥龍庵在南康縣西北。其地蒼崖四壁。怒濤中瀉。大壑淵深。有黃石數丈。在危泉激湍中。若蜿蜒飛舞。世稱爲臥龍石。朱文公知南康軍。作庵其旁。欲以休隱。繪孔明像於其中。自爲之記。

## 壽樟亭

壽樟亭在建昌縣城內。宋黃庭堅有記。宋時。邑人李公懋入朝。高宗問樟今安否。對以枝葉扶疏。歲寒獨秀。卽此。

## 掛劍松

掛劍松在建昌縣北五里冷水觀內。盤屈奇古。俗稱爲壽松。相傳晉許遜嘗掛劍於此。遜字敬之。其母夢金鳳啣珠墮掌而生。從吳猛得神方秘法。修煉爲事。晉太康初爲旌陽令。大施濟利。尋棄官東歸。遇譙母。傳以道術。遂斬蛇誅蛟。悉除民害。慮豫章爲游州。蛟螭所穴。乃於牙城南井。鑄鐵爲柱。下施八



索鎮鎖地脈。自是水妖屏迹。城邑無虞。後隱居精修。年一百三十歲。舉家飛昇。宋時封神功妙濟真君。

### 三 九江

九江在南康府之北。其地北阻大江。南屏廬山。中包彭蠡。西控武漢。下扼皖吳。截江路之中流。爲全省之門戶。溯江而上。爲第四通商港。九南鐵路於此爲起點。其城北瀕江岸。

#### 延枝山

延枝山在德化縣城內。山下大園池。卽潯陽別墅。種植花木。布置頗爲幽雅。供人遊覽。

#### 石鐘山

石鐘山在湖口縣彭蠡湖口。壁立水心。石多罅穴。洪濤巨浪。吞吐其間。鏗然作聲。有如洪鐘。故名。蘇軾嘗遊於此。作記曰。水經云。彭蠡之口。有石鐘山焉。

酈元以爲下臨深潭。微風鼓浪。水石相搏。聲如洪鐘。是說也。人常疑之。今以鐘磬置水中。雖大風浪。不能鳴也。而況石乎。至唐李渤。始訪其遺蹤。得雙石於潭上。扣而聆之。南聲函胡。北音清越。桴止響騰。餘韻徐歇。自以爲得之矣。然是說也。余尤疑之。石之鏗然作聲者。所在皆是也。而此獨以鐘名。何哉。元豐七年。六月丁丑。余自齊安舟行。適臨汝。而長子邁。將赴饒之德興尉。送之至湖口。因得觀所謂石鐘者。寺僧使小童持斧於亂石間。擇其一二扣之。硃硃然。余固笑而不信也。至其夜月明。獨與邁乘小舟。至絕壁下。大石側立千尺。如猛獸奇鬼。森然欲搏人。而山上棲鶻。聞人聲亦驚起。磔磔雲霄間。又有若老人歎且笑於山谷中者。或曰。此鶴鶴也。余方心動欲還。而大聲發於水上。噌吰如鐘鼓不絕。舟人大恐。徐而察之。則山下皆石穴罅。不知其淺深。微波入焉。涵澹澎湃。而爲此也。舟廻至兩山間。將入港口。有大石當中流。可坐百人。空中而多竅。與風水相吞吐。有窾坎鏗鞳之聲。與向之噌吰者相應。如

樂作焉。因笑謂邁曰。汝識之乎。噲。呖者。周景王之無射也。歿坎鐙。轄者。魏獻子之歌鐘也。古之人不余欺也。事不目見耳聞。而臆斷其有無可乎。酈元之所見聞。殆與余同。而言之不詳。士大夫終不肯以小舟夜泊絕壁之下。故莫能知。而漁工水師。雖知而不能言。此世所以不傳也。而陋者乃以斧斤考擊而求之。自以爲得其實。余是以記之。蓋歎酈元之簡。而笑李渤之陋也。

擲筆峯

擲筆峯在德化縣西南。大林峰之北。慧遠嘗於其地作涅槃經疏。疏成擲筆。因以爲名。

庾樓

庾樓在德化縣城北。爲庾亮刺江州時建。背負匡廬。面臨大江。登其上。可領山水之勝。

五柳館

五柳館在彭澤縣城內。晉陶淵明故居。館前栽柳樹五株。扶疏成陰。因自號五柳先生。作傳云。先生不知何許人也。亦不詳其姓字。宅邊有五柳樹。因以爲號焉。閑靜少言。不慕榮利。好讀書。不求甚解。每有會意。便欣然忘食。性嗜酒。家貧不能常得。親舊知其如此。或置酒而招之。造飲輒盡。期在必醉。既醉而退。曾不吝情。去留環堵蕭然。不蔽風日。短褐穿結。簞瓢屢空。晏如也。常著文章自娛。頗示已意。忘懷得失。以此自終。贊曰。黔婁有言。不戚戚於貧賤。不汲汲於富貴。其言茲若人之儔乎。銜觴賦詩。以樂其志。無懷氏之民歟。葛天氏之民歟。

### 三笑亭

三笑亭在德化縣東林寺前。慧遠不過虎溪。一日送陶潛與陸修靜。不覺過之。相與大笑。

### 琵琶亭

琵琶亭在德化縣西大江濱。唐白居易爲江州刺史。送客湓浦。聞鄰舟琵琶聲。詢之乃長安老妓。爲作琵琶行。有序云。元和十年。余左遷九江郡司馬。明年秋。送客湓浦口。聞舟中夜彈琵琶者。聽其音錚錚然。有京都聲。問其人本長安倡女。嘗學琵琶於穆曹二善才。年長色衰。委身爲賈人婦。遂命酒使快彈數曲。曲罷憫然自敘。少小時歡樂事。今漂淪憔悴。轉徙於江湖間。余出官二年。恬然自安。感斯人言。是夕始覺有遷謫意。因爲長句。歌以贈之。凡六百一十二言。命曰琵琶行。歌曰。潯陽江頭夜送客。楓葉荻花秋瑟瑟。主人下馬客在船。舉酒欲飲無管絃。醉不成歡慘將別。別時茫茫江浸月。忽聞水上琵琶聲。主人忘歸客不發。尋聲闔問彈者誰。琵琶聲停欲語遲。移酒相近邀相見。添酒回燈重開宴。千呼萬喚始出來。猶抱琵琶半遮面。轉軸撥絃三兩聲。未成曲調先有情。絃絃掩抑聲聲思。似訴平生不得志。低眉信手續續彈。說盡心中無限事。輕攏慢撚抹復挑。初爲霓裳後六么。大絃嘈嘈如急雨。小絃

切切如私語。嘈嘈切切錯雜彈。大珠小珠落玉盤。間關鶯語花底滑。幽咽流  
泉水下灘。水泉冷澁絃凝絕。凝絕不通聲暫歇。別有憂情闇恨生。此時無聲  
勝有聲。銀瓶乍破水漿迸。鐵騎突出刀鎗鳴。曲終收撥當心畫。四絃一聲如  
裂帛。東船西舫悄無言。惟見江心秋月白。沉吟收撥插絃中。整衣頓裳起歛  
容。自言本是京城女。家在蝦蟆嶺下住。十三學得琵琶成。名屬教坊第一部。  
曲罷曾教善才服。裝成每被秋娘妒。五陵少年爭纏頭。一曲紅綃不知數。鈿  
頭雲篋擊節碎。血色羅裙翻酒污。今年歡笑復明年。秋月春風等閒度。弟走  
從軍阿姨死。朝去暮來顏色故。門前冷落車馬稀。老大嫁作商人婦。商人重  
利輕別離。前年浮梁買茶去。去來江口守空船。繞船明月江水寒。夜深忽夢  
少年事。夢啼妝淚紅闌干。我聞琵琶已歎息。又聞此語重唧唧。同是天涯淪  
落人。相逢何必曾相識。我從去年辭帝京。謫居臥病潯陽城。潯陽地僻無音  
樂。終歲不聞絲竹聲。住近湓江地低濕。黃蘆苦竹繞宅生。其間旦暮聞何物。

杜鵑啼血猿哀鳴。春江花朝秋月夜。往往取酒還相傾。豈無山歌與村笛。嘔啞嘲哳難爲聽。今夜聞君琵琶語。如聽仙樂耳暫明。莫辭更坐彈一曲。爲君翻作琵琶行。感我此言良久立。却坐促絃絃轉急。淒淒不似向前聲。滿座重聞皆掩泣。座中泣下誰最多。江州司馬青衫濕。

### 墨竹亭

墨竹亭在瑞昌縣西。宋蘇軾經此。題詩於石上。以餘墨寫竹。後人建亭於其地。因以爲名。

### 浸月亭

浸月亭在德化縣西甘棠湖中。有土墩圓如月。白居易建。後人取其別時茫茫江浸月之句以名。

### 牯牛嶺

牯牛嶺在德化縣廬山北。其地舊號長衝。泉水甘美。風景清絕。今西人多築

室卜居焉。

#### 黃龍峽

黃龍峽在牯牛嶺。有大樹三。大可十餘圍。土人呼曰寶樹。其二枝已歷二千餘年之久。

#### 滴水石

滴水石在牯牛嶺。地甚崎嶇。大石嵯峨。備極怪異。或曲如龍。或踞如虎。可謂鬼斧神工。

### 四 饒州

饒州在南昌府之東北。地勢三面多山。惟瀕鄱陽湖低平。夏秋水盛。浸沒田廬。冬春湖底淺露。洲渚間縈迴如溝澮。有昌江會安樂河爲鄱江西流瀦入鄱陽湖。城瀕鄱江東岸。

#### 芝山



芝山在鄱陽縣北。舊名上素山。唐刺史薛振於山中得芝草三莖。因改名。山下有能仁閣。可以眺望匡廬。

### 石虹山

石虹山在餘干縣北。橫峯跨水。文彩若虹。上有石室甚廣。其旁石障橫列。如屏風然。

### 梅巖

梅巖在餘干縣藏山上。懸崖處多古梅。西有溪山風雨亭。宋赴汝愚嘗讀書於此。汝愚字子直。累官樞密院。孝宗崩。光宗疾篤。中外洶洶。汝愚奮不顧身。頃刻定大計。收召賢士。輔甯宗。未幾爲韓侂胄所構。謫居永州。卒封沂國公。諡忠定。

### 清灣

清灣在鄱陽縣東七里。隋開皇中。太守梁文謙涖官清潔。取此灣水以自供。

後人思其德，因號清灣。

### 石城巖

石城巖在樂平縣東南六十里。怪石縈結，中有石洞。洞上李常題叢玉二字。李伯時繪爲圖。

### 延賓坊

延賓坊在鄱陽縣城內蕭家港。相傳爲陶侃故居。卽陶母截髮易酒肴，以延范逵之處。侃少時家貧，嘗有長者車及門。鄰人問曰：何不延之？侃曰：貧不能爲禮。鄰人乃密於牆頭送濁醪隻雞，遂成終日之歡。一日，范逵宿其家。侃倉卒無以待。母湛氏謂侃曰：汝第留客，吾自爲計。乃截髮易酒肴，又判薦以秣其馬。逵知之，嘆曰：非此母不生此兒。至京，帝盛稱揚之。侃由是知名。

### 五老亭

五老亭在鄱陽縣北芝山巔。因范仲淹有五老夕陽開之句，故名。其地高峻。

風景絕勝。

飽山閣

飽山閣在浮梁縣城內縣署前。宋尙書程瑀建。四面多山。飽看峯巒。爲一邑登覽之勝。

蜀錦亭

蜀錦亭在鄱陽縣舊府署內。宋范仲淹曾手植海棠二株。其後鄒柯建亭。題曰蜀錦。

止水亭

止水亭在鄱陽縣北芝山後。宋江萬里罷相後。寓居於此。鑿池於芝山之麓。築亭於池上。題其額曰止水。當時人皆莫喻其用意之所在。及元兵陷城。萬里遂赴水死。

五 廣信

廣信在饒州府之東南。周時雜隸吳楚。秦屬會稽郡。唐置信州。元爲信州路。明改爲廣信府。東踰玉山。可達三衢。南出鉛山。可通八閩。實吳楚閩越轂綰之口。

### 玉山

玉山在玉山縣北。一名玉斗。南唐時縣令楊文逸嘗夢一羽衣。自稱懷玉山人來謁。未幾其孫億生。因名。

### 龍虎山

龍虎山在貴溪縣西南。兩峯對峙如龍虎。張道陵後人世居於此。其居號曰上清宮。俗稱爲天師。道陵字輔漢。子房八世孫。漢建武十年。生於天目山。龐眉廣頰。隆準方頤。七歲。通道德經。地理河洛圖緯之書。皆極其奧。退隱北邙山。有白虎銜符文置座旁。章帝召之不起。和帝徵爲太傅。封冀縣侯。三召皆不就。入蜀隱鷄鳴山。弟子有王長者。習天文。通黃老。相與煉龍虎大丹。二年。

有青龍白虎來護丹鼎。丹成。道陵服之。返老成少。一日。與王共入北嵩山。遇綉衣使者告之曰。中峰石室。藏上三皇內文。黃帝九鼎。太清丹經。得而修之。乃可昇天。於是道陵戒齋入石室。果得丹書。精思修煉。得分形散影之妙。忽聞仙樂隱隱。太上老君降於鶴鳴山。謂真人曰。近蜀中有六大鬼神。枉暴生民。子往治之。則子功無量。而名銘丹臺矣。乃授以正一盟威秘錄。三清衆經符錄。丹竈秘訣。雌雄劍二。及道冠霞服。方裙朱履各一副。且曰。與子千日爲期。後會閩苑。真人領訖。日味秘文。能召集三萬六千神。遂往青城。付八部鬼師。殲六大魔王。真人至蒼溪靈臺山。遂與王長卜居於此。老君命使者告曰。子殺鬼過多。上帝責予之過。子再修三千六百日。吾待子於上清八景宮中。真人乃與弟子王長趙昇。復往鶴鳴山。重修二十餘年。一日午時。忽見一朱衣捧玉函進。曰。奉上清真符。召真人遊閩苑。遂引登車至闕。闕榜云。擬太元都正一真人闕。真人既至。羣仙禮謁。良久。勅還人間。勸度未悟。真人遂還陽。

平山以飛昇輕舉之法。諸品秘籙。斬邪二劍。玉册。玉印。授其長子衡。戒之曰。領此文。驅邪誅妖。佐國安民。世世一子。紹吾之位。非吾家子孫。不傳。永壽元年正月七日。真人與夫人雍氏及弟子王長。趙昇。於靈臺峰。白日昇天。今其子孫世襲真人。居於江西貴溪之龍虎山。

### 靈山

靈山在上饒縣西北六十里。一名靈鷲山。地多珍木奇卉。西峰絕頂。有葛仙壇遺址。

### 相公府

相公府在鉛山縣北。卽霞落園故址。宋李綱將兵萬五千人駐於此。俗呼其地爲相公府。

### 石室

石室在弋陽縣南。昔有張氏隱此。琢石爲室。其形如困。郡守庾翼欲表薦之。

隱而不見。

### 稼軒

稼軒在上饒縣北。宋辛棄疾築小軒。面臨曠野。秋禾登場。風景清絕。因自號曰稼軒。棄疾字幼安。與朱熹友善。熹歿。黨禁方嚴。無敢往弔者。棄疾獨爲文往哭之。謝枋得稱其慷慨大節。不在岳武穆之下。卒諡忠敏。所著有稼軒集。理宗朝。擁節鉞。急流勇退。優游泉林。以家事付兒曹。作西江月云。萬事雲煙都過。一身蒲柳先零。而今何事最相宜。宜醉宜遊宜睡。蚤起催科了辦。更量出入支收。乃翁依舊管些兒。管竹管山管水。

## 六 撫州

撫州在南昌府東南。秦屬九江郡。漢屬豫章。三國吳曰臨川。隋唐宋元曰撫州。明爲撫州府。地多山而不甚高。盱江挾宜黃水斜貫其間。城當二水會口之東南。

## 靈谷山

靈谷山在臨川縣城南。上有瀑泉飛流。石室甚廣。中有靈象。好奇之士。多往遊其地。

## 緡經臺

緡經臺在臨川縣東南四里。晉康樂侯謝公。嘗緡繹涅槃經於此。後人築臺。因以爲名。

## 玉茗亭

玉茗亭在臨川縣城內。宋時建。亭下有花名玉茗。人以楊州瓊花比之。頗多名人題咏。

## 三山小隱

三山小隱在崇仁縣南。宋尙書何異建。山莊有三。曰浮石巖石。玲瓏合之曰三山小隱。



### 王右軍宅

王右軍宅在臨川縣城內。卽今學宮。王右軍爲臨川內史時所居。其地爽塏。山川如畫。

### 魏夫人壇

魏夫人壇在臨川縣西北。夫人名華存。晉魏舒之女。少讀老莊。夫死避俗於此。遂立壇修道。

## 七 建昌

建昌在撫州府之東南。地勢多山。有麻姑山、飛猿嶺、軍峰山之秀峯。接於閩嶠。其出杉關向邵武一道。歷史上最爲有名。其城居於諸水之間。西岸有大橋曰萬年。長約里許。

### 麻姑山

麻姑山在南城縣南。周四百里。上有飛瀑。瀉注如練。山頂有古壇。俗傳麻姑

修煉於此。

### 壺公巖

壺公巖在南豐縣西南。相傳懸壺先生嘗委蛻於此。巖極高峻。人跡罕至。其丹竈尙存。

### 軍山

軍山在南豐縣南。高十九里許。山峯有士騎磨甲之狀。舊傳吳芮攻南越。嘗駐軍於此。

### 照碧亭

照碧亭在新城縣北。左面石峽。下臨深潭。宋楊傑嘗題詩。有山水相照碧之句。因名。

### 平遠臺

平遠臺在南城縣城內。宋郡守張允建。地勢高爽。眺望江山。宛若畫圖。其西

爲極目亭。

識舟亭

識舟亭在南城縣高嶺上。陳叔和建。亭背山巖。臨深澗。遠望江流。片帆出沒。最爲佳致。

八 臨江

臨江在南昌府之西南。秦屬九江郡。漢屬豫章郡。唐曰洪州。宋置臨江軍。元設臨江路。明改爲臨江府。其地南部多山。北部坦平。贛水挾袁江斜貫其間。城瀕袁江西岸。

玉澗

玉澗在峽江縣東北。一名玉溪。其源出玉筍山。廻互紆曲。縈流清澈。舊號爲三十六澗。

吟峯

吟峯在新喻縣北。山峯秀麗。高出雲表。宋初有吳鸞者。與其弟鳳。築亭吟嘯其中。因名。

### 戲魚堂

戲魚堂在新淦縣東。宋劉次莊謫居於此。自號戲魚翁。摹淳化禁中帖十卷。刻石堂中。

### 近江樓

近江樓在清江縣東南。宋知軍魏廷玉建。以朱子有征驂聊駐近江樓之句。故以爲名。

## 九 吉安

吉安在臨江之西南。地勢多山。贛水挾遂江。孤江、禾水、溶江、烏江等。曲折貫其間。中有十八灘。水清可鑑。碎石如鋪錦。夾岸青嶂。兀立若屏。故廬陵山水學士大夫多稱道之。

### 青原山

青原山在廬陵縣東南。中有駝峯、鷓鴣嶺。山勢鬱盤。天然勝區。顏真卿題祖關二字於石。

### 芙蓉山

芙蓉山在萬安縣西。山形秀麗。周濂溪謂不亞文章嶺。其門人因賦錦繡湖邊徵理學。芙蓉山裏見文章之句。

### 快閣

快閣在泰和縣東南城上。邑令沈遵名曰快閣。後黃庭堅曾賦詩云。快閣東西倚晚晴。

### 寒江亭

寒江亭泰和縣永和市。宋曾悅心建。劉鑑謂東昌之景。一十有五。以秋月寒江亭爲勝。

二友堂

二友堂在廬陵縣舊府署內。堂前有古松與竹對植。郡守李彌遜開軒其下。胡銓爲記。

姚崇石室

姚崇石室在永新縣西北。唐姚崇布衣時曾卜居於此。讀書數載。今其遺墟松竹猶存。

十 贛州

贛州因章貢二水合流其間。故名。漢曰章貢。屬豫章郡。晉曰南康。隋唐曰虔州。宋元曰贛州。明爲贛州府。地當贛江上游。西控大庾。東阻簫巖。爲閩粵之門戶。

螺亭石

螺亭石在贛縣東南。有大石臨水。號曰螺亭。蘇軾詩。薄暮漁樵人去盡。碧溪

青嶂遶螺亭。

鬱孤臺

鬱孤臺在贛縣城內。隆阜百步。鬱然孤峙。唐李勉爲州刺史。登臺北望。慨歎改名望闕。宋蘇軾鬱孤臺詩云。入境見圖畫。鬱孤如舊遊。山爲翠浪湧。水作玉虹流。日麗崆峒曉。風酣章貢秋。丹青未變葉。鱗甲欲生洲。嵐氣昏城樹。灘聲入市樓。煙雲侵嶺路。草木半炎洲。故國千峯外。高臺十日留。他年三宿處。準擬繫歸舟。再過鬱孤臺詩。仍用前韻。詩云。吾生如寄耳。嶺海亦閒遊。贛石三百里。寒江尺五流。楚山微有靄。越瘴久無秋。望斷橫雲嶠。魂飛咤雪洲。曉鐘時出寺。暮鼓各鳴樓。歸路迷千嶂。勞生閱百州。不隨猿鶴化。甘作賈胡留。祇有貂裘在。猶堪買釣舟。

濂溪閣

濂溪閣在雩都縣南善山上。宋周濂溪倅虔時。曾游此賦詩。邑令沈希顏因

建閣於其地。

### 八境臺

八境臺在贛縣東北城上。東望八閩。南眺五嶺。煙雲出沒。林木繁麗。蘇軾曾題詩其上。

### 翠玉樓

翠玉樓在贛縣城內。郡守留正建。取蘇軾詩。山爲翠浪湧。水作玉虹流之句。以名。

### 章貢臺

章貢臺在贛縣城內西北隅。宋趙抃爲守時。因野景亭舊址。築臺名曰章貢。以紀其實。

## 十一 南安

南安在贛州西南。地據章水之源。逼近南嶺。南踰大庾。以通南韶。郡踰騎田。



以達郴桂。

### 大庾嶺

大庾嶺在大庾縣南二十五里。延袤二百里。螺轉九磴而至頂。登者難之。唐張九齡開鑿山路。始通車馬。爲文記之。嶺上多梅。故亦稱梅嶺。梅之植。始於宋管銳。趙孟頫以嶺下官驛。徧栽梅樹。扁曰梅花國。世謂大庾嶺上梅。南枝落。北枝開。蓋嶺之南北。氣候不齊也。

### 陳公臺

陳公臺在南康縣城內。宋陳升之父爲主簿時。以石甃成。建臺曰翠微。後人易以今名。

### 揖秀亭

揖秀亭在大庾縣城內。宋淳熙中郡守李大正建。羣峯秀麗。拱揖於前。爲登覽之勝地。

## 綠陰亭

綠陰亭在大庾縣城內東南隅。宋郡守李夷庚建。亭側有池。水色清瑩。池右竹樹森列。

## 十二 寧都

寧都爲漢雩都縣地。三國吳置陽都縣。晉改爲寧都縣。元升爲寧都州。在贛州府東北。地勢高峻。山嶺叢深。城據梅江之濱。水自雩都入貢。其上不通舟楫。

## 灰山

灰山在寧都縣西北。四圍陡絕。一徑羊腸。其頂平曠。捫葛始上。有泉池之勝。爲歷代避兵處。清初州人不肯薙髮者。入據山中。清兵仰攻不下。久之山中糧盡。乃出降。

## 魚骨潭

魚骨潭在石城縣東萬山間。石巖倒垂。巖上飛瀑。下蔽潭口。稱爲奇勝。邑人多往遊焉。

### 熙熙亭

熙熙亭在寧都縣南城外平原之中。崛起一阜。宋時建亭於其上。爲行人休憩之所。

### 凌雲亭

凌雲亭在寧都縣西金精山上。孤亭兀立。高凌雲霄。故名。俗傳漢女張麗英修道之處。

## 十三 瑞州

瑞州在南昌府之西。唐曰靖州。又曰米州。曰筠州。宋置瑞州。元設瑞州路。明改爲瑞州府。巖谷深秀。瑞河橫貫其間。溯河踰嶺。西入長沙。其城瀕於錦江北岸。

黃蘗山

黃蘗山在新昌縣東北。山頂有寺曰鷲峯。唐宣宗微時遊此。曾與僧黃蘗觀瀑聯句。

鈞山

鈞山在高安縣南三十里。巖石怪異。松林蒼古。蔚爲奇觀。山北有劉恕讀書堂遺址。

珠湖

珠湖在高安縣南湖中。多紅蓮。花開極盛。遊人多往觀之。其水四時瑩澈。相傳中有仙人遺珠。

梅福宅

梅福宅在高安縣西。漢梅福字子真。常以讀書養性爲事。後棄官隱居。至今傳爲仙去。

### 康樂城

康樂城在高安縣東北。爲謝靈運封康樂侯故第。城外山水廻繞。中有書臺。石硯尙存。

### 東軒

東軒在高安縣城內舊貢院。宋蘇轍監酒稅時建。爲休息之所。其兄軾過訪。留十日乃去。轍自爲記云。余既以罪謫監筠州鹽酒稅。未至。大雨。筠水泛溢。蔑南市。登北岸。敗刺史府門。鹽酒稅治舍。俯江之濬。水患猶甚。既至。敝不可處。乃告於郡。假部使者府以居。郡憐其無歸也。許之。歲十二月。乃克支其欵。斜補其圯缺。闢廳事堂之東爲軒。種杉二本。竹百箇。以爲宴休之所。然鹽酒稅舊以三吏共事。余至。其二人適皆罷去。事委於一。晝則坐市區。鬻鹽沽酒。稅豚魚。與市人爭尋尺以自效。暮歸。筋力疲廢。輒昏然就睡。不知夜之既旦。旦則復出營職。終不能安於所謂東軒者。每日暮出入其旁。未嘗不啞然自

笑也。余昔少年讀書。竊嘗怪以顏子簞食瓢飲。居於陋巷。人不堪其憂。顏子不改其樂。私以爲雖不欲仕。然抱關擊柝。尙可自養而不害於學。何至困辱貧窶。自苦如此。及來筠州。勤勞鹽米之間。無一日之休。雖欲棄塵垢。解羈繫。自放於道德之場。而事每刼而留之。然後知顏子之所以甘心貧賤。不肯求升斗之祿。以自給者。良以其害於學故也。嗟夫。士方其未聞大道。沈酣勢利。以玉帛子女自厚。自以爲樂矣。及其循理以求道。落其華而收其實。從容自得。不知夫天地之爲大。與无生之爲變。而况其下者乎。故其樂也。足以易窮餓而不怨。雖南面之王。不能加之。蓋非有德不能任也。余方區區欲磨洗濁汚。睇聖賢之萬一。自視缺然。而欲庶幾顏氏之福。宜其不可得哉。若夫孔子周行天下。高爲魯司寇。下爲乘田委吏。惟其所遇。無所不可。彼蓋達者之事。而非學者之所望也。余旣以譴來此。雖知桎梏之害。而勢不得去。獨幸歲月之久。世或哀而憐之。使得復歸田里。治先人之敝廬。爲環堵之室而居之。然

後追求顏氏之樂。懷思東軒。優游以忘其老。然而非所敢望也。

### 碧落堂

碧落堂在高安縣舊府署後。碧落山巔。登臨其上。全城在目。文天祥建。楊萬里有詩。

### 相公堆

相公堆在新昌縣東。宋晏殊高祖壙居此。宅旁有堆。殊嘗戲其上。及貴。人呼爲相公堆。

## 十四 袁州

袁州在臨江之西。地據羅霄山之脈。盤鬱境內。爲贛湘東西分水嶺。嶺東之水。若瑞河、袁江、溶江。皆東流入贛。嶺西之水。若瀏、若淶、若攸。水皆西流入湘。山水高急。川谷易澗。

### 宜春臺

宜春臺在宜春縣城內東南隅。漢宜春侯劉成於城中立五臺。以宜春爲勝。旁植桃李。高峯獨聳。樹木蔥蘢。上有道院。名曰第一峯。內有銅缸。重數百斤。右有眞武辟火圖。

### 化成巖

化成巖在宜春縣北城外三里許。巖上有古寺。門前怪石嵯峨。樹木扶疏。巖右有青蓮洞。其上石壁多鐫刻名人題詠。巖近秀江。遊人多以舟往。棲泊其旁。春夏之間最盛。

### 袁山

袁山在宜春縣北門外。峯巒秀拔。大小如雙螺。晉高士袁京隱此。登城一望。卽在目前。

### 玉女峯

玉女峯在萍鄉縣東。一名玉女岡。天將雨。有五色雲氣湧出巖石間。俗呼爲



玉女披衣。

### 楊岐山

楊岐山在萍鄉縣北路宣化里。邑中諸山皆發脈於此。山上有九房石、五色石、仙碁石、羅漢洞、白猿洞、諸勝蹟。又有雙鳳寺。寺內有乘廣禪師碑。爲唐劉禹錫撰文。

### 飛泳樓


飛泳樓在萍鄉縣城內縣署西。舊有放生亭。後縣令王謙建樓其地。取鳥飛魚泳之義。

### 需宴亭

需宴亭在宜春縣城內舊府署南。唐天寶中太守房瑄建。元和初。刺史王涯刻李華所撰房瑄德政碑於石。柳宗元書其碑陰。

### 羅漢松

羅漢松在萍鄉縣南門寶積寺內。相傳爲宋黃庭堅手植。枝葉蒼茂。樹下多  
名人題詠。





# 中華名勝古蹟目錄

## 第十編 浙江

### 一 杭州……………一一四七

西湖 白沙堤 斷橋殘雪亭 孤山 平湖秋月亭 吟香別業 聖因寺 文瀾

閣 公園 西冷印社 六一泉 俞樓 西冷橋 巢居閣 放鶴亭 林逋墓

林社 馮小青墓 蘇小小墓 鳳林寺 蘇公堤 六橋 花港觀魚亭 蘇堤春

曉亭 曲院荷風亭 小萬柳堂 紅樓山莊 水竹居 玉帶橋 金沙港 竹素

園 鄂王廟 岳墳 湖心亭 阮公墩 三潭印月 放生池 退省庵 小孤山

昭慶寺 寶石山 保俶塔 落星石 川正洞 大佛寺 葛嶺 初陽臺 棲霞

嶺 棲霞洞 紫雲洞 壁洞 古劍關 清漣寺 玉泉 洗心亭 細雨泉 靈

峯補梅庵 靈峯寺 靈隱山 雲林寺 飛來峯 理公巖 玉乳洞 冷泉亭

北高峯 靈順廟 韜光庵 韜光泉 韜光徑 石樓 金蓮池 丹崖 下天竺  
寺 金佛洞 三生石 月桂峯 中天竺寺 上天竺寺 乳竇峯 天門山 柳  
浪聞鶯亭 錢王祠 南屏山 淨慈寺 南屏晚鐘亭 神運井 小有天園 有  
恆居雷峯 黃妃塔 慈雲庵 方家峪 赤山 法雲講寺 九曜山 石屋洞  
烟霞洞 烟霞寺 呼嵩閣 佛手巖 南高峯 雙峯插雲亭 天地洞 千人洞  
白天窩樓 法相寺 大慈山 大定慧寺 虎跑泉 丁家山 蕉石山房 蕉屏  
風篁嶺 龍井 碧螺峯 獅子峯 九溪 滿覺壠 理安山 理安寺 法雨巖  
松巔閣 五雲山 雲棲臨 洗心亭 雲棲寺 萬松嶺 鳳凰山 聖果寺 捍  
海塘 錢塘江 鐵轆浦 龍山 靈光洞 六和塔 月輪寺 定山 浮山 吳  
山 巫山十二峯 寶月山 七寶山 瑞石山 紫陽庵 伍公山 吳山第一泉  
崇義祠 法華山 花隴 石人隴 夕照庵 梅花泉 南漳湖 秋雪庵 桐隴  
白龍潭 荆山 馬陸 湖墅 珠潭 皋亭山 黃鶴山 佛日塢 桐扣山 超

山 小隱山 大滌山 三休亭 百尺樓

## 二 嘉興

杉青關 南湖 瓶山 永安湖 烟雨樓 弄珠樓 煮茶亭 梅里 朱買臣墓  
梅花道人墓

四七—四九

## 三 湖州

昇山 卞山 玲瓏山 罨畫溪 前溪 梅溪 白蘋洲 消暑樓 浮暉閣 谿  
光亭 西亭 三癸亭

四九—五三

## 四 寧波

四明山 天童山 雪竇山 陶公山 招寶山 月湖 慈溪 靈峯山 四顧山  
蛟門山 虎蹲山 響巖 虞喜宅 賀季真祠

五三—五七

## 五 定海

桃花山 竹嶼 普陀山 妙莊岳路 白華山 普濟寺 海印池 永壽橋 太

五七—六四

子塔 千步沙 盤陀庵 西天法界 梅福庵 盤陀石 觀音洞 二龜聽法石

潮音洞 紫竹林 南天門 仙人井 朝陽洞 長生禪院 雪浪山 法雨庵

佛頂山 雲扶石 蓮花洋 梵音洞

六 紹興……………六四—六九

府山 鑑湖 興隆山 蕭山 嵯山 剡溪 禹穴 戒珠山 若耶溪 曹娥江

鵝池 七星巖 千秋亭 蘭亭 越王臺 尚書塢 曹娥碑 題扇橋 西施村

窆石亭

七 台州……………六九—七二

天台山 華頂峯 桃源洞 巾子山 桐柏山 萬壑風烟亭 小樊川 浣月亭

梅花吟社 鄭慶宅

八 金華……………七二—七五

金華山 赤松山 穀水 畫溪 繡川湖 椒石潭 八詠樓 蠟屐亭 涵碧亭

水樂亭

九 衢州……………七五—七八

仙霞嶺 趙公巖 翠微山 浮石潭 女樓 逸老亭 殷浩宅 證夢亭

十 嚴州……………七八—八〇

嚴陵山 桐君山 小金山 印渚 垂雲洞 百丈漈 嚴陵釣臺 思范亭 溪

山偉觀亭 高風堂

十一 温州……………八〇—八三

雁蕩山 吹臺山 謝客巖 白石巖 仙巖 戲綵堂 謝公樓 北亭 觀潮閣

十二 處州……………八三—八五

蓮城山 小蓬萊 突星瀨 好溪 見山亭 忘歸臺 南園 留棧閣



---

中華名勝古蹟 第十編 目錄



# 中華名勝古蹟

## 第十編 浙江

### 一 杭州

杭州爲浙江省會。最古曰禹杭。秦曰錢塘。隋曰杭州。五代時吳越國王錢鏐都此。南宋作京。號曰臨宋。清爲仁和錢塘二縣治。民國成立。併仁和錢塘而爲杭縣。廢杭州府。襟江帶海。擁湖負山。靈秀之氣。甲於全國。其境東至海寧。西界餘杭。北接崇德。南毗富陽。

### 西湖

西湖周三十餘里。三面環山。谿谷縷注。下有淵泉百道。瀦而爲湖。蓄潔淳深。圓瑩若鏡。自唐李泌鑿通湖流。白居易及宋蘇軾出守是邦。築二長堤。復有騷人墨客。高僧名妓。寄跡其間。名始大著。宋高宗建都臨安。冠蓋雲集。金粉

繁華甲於一時。世有銷金鍋之稱。

### 白沙堤

白沙堤在錢塘門外。又名千錦塘。堤中建望湖亭。錦帶橋垂露亭爲一湖之勝。清雍正間。堤加廣丈餘。加高二丈。補植花木。今桃柳尙盛。馬嘶芳人草醉。玉樓之景。輒於此得之。

### 斷橋殘雪亭

斷橋在白沙堤。介於前後湖之間。水光瀲灩。橋影倒浸。每值春雪未消。葛嶺一帶樓臺上下。如鋪瓊砌玉。晶瑩朗徹。遊此者不啻玉山上行。清聖祖題曰斷橋殘雪。構亭橋上。

### 孤山

孤山一名孤嶼。又稱瀛嶼。因獨峙湖心。旁無聯屬。故名。山前爲外湖。山後爲後湖。

平湖秋月亭

亭在孤山東畔。清康熙三十八年建。爲明季平湖堂舊址。上懸清聖祖書平湖秋月額。旁構水軒。三面臨水。每逢秋夜。天清氣爽。皓月臨空。湖水澄瑩。千頃一碧。如入水晶宮裏。

吟香別業

吟香別業在平湖秋月亭之西。一名勾留處。取白居易詩。一半勾留是此湖之句。因名。

聖因寺

聖因寺舊爲行宮。乃清康熙南巡駐蹕之所。今改名浙軍昭忠祠。祠前有浙軍紀念碑。

文瀾閣

文瀾閣在聖因寺西。藏四庫全書。閣前假山嶙峋。縹雲石在其中。有橋有洞。

結構殊佳。

### 公園

公園在文瀾閣西。以聖因寺西偏改築。依山傍水。亭欄屈曲。花木參差。爲湖山最勝處。

### 西冷印社

西冷印社在公園之後。中有山川雨露圖書室、寶印山房、印泉、文泉、小盤谷、諸勝景。

### 六一泉

六一泉在廣化寺中。宋歐陽修號六一居士。蘇軾守杭。懷慕歐陽風流。遂以其號名泉。

### 俞樓

俞樓在廣化寺旁。爲清俞蔭甫別墅。名曰小曲園。遊人登樓眺望。全湖勝景。

一覽無餘。

### 西冷橋

西冷橋在白沙堤盡處。昔趙孟堅薄暮躡權於此。指林麓最幽處曰。此真董北苑得意筆。

### 巢居閣

巢居閣在孤山之陰。宋林逋隱居時所搆。遊人登閣長嘯。輒有迴響。世稱爲空谷傳聲。

### 放鶴亭

放鶴亭在巢居閣旁。林逋蓄二鶴。每泛舟湖中。客至。童子縱鶴飛報。逋卽歸。元至元間。陳子安建亭於其地。清聖祖南巡。題放鶴二字。童香光書舞鶴賦大字一幅。勒石亭中。

### 林逋墓

林逋墓在放鶴亭南。逋字君復。賜諡和靖先生。墓側有小冢。相傳爲宋女馬菊香瘞所。

林社

林社在林逋墓西。清光緒間。侯官林啟爲杭州知府。治績卓著。興學育才。卒於官。杭人感懷其德。留葬孤山。並於墓側建林社以祀之。長樂高鳳岐佐林太守治杭有聲。死後亦附祀焉。

馮小青墓

馮小青墓在放鶴亭南。旁有名伶馮春航碑。馮善演小青事。好事者爲留片石。以誌因緣。

蘇小小墓

蘇小小墓在西泠橋側。蘇爲錢塘名妓。南齊時人。死後葬此。墓旁舊有秋瑾墳。今他徙。

## 鳳林寺

鳳林寺在西冷橋西。唐元和二年建。爲烏窠禪師講經地。舊名定業院。明時始改今名。

## 蘇公堤

蘇公堤爲宋蘇軾所築。軾浚西湖。以所積葑草。疊爲長堤。夾道種柳。界湖爲內外二湖。

## 六橋

六橋在蘇堤上。名曰映波、鎖瀾、望山、壓堤、東浦、跨虹。蘇軾詩。六橋橫絕天漢上。北山始與南屏通。

## 花港觀魚亭

亭在望山橋南。橋下水名花港。通花家山。山下舊有盧園。爲宋內侍盧允升別墅。清康熙間。建亭於花港之南。旁濬方池。清碧澈底。游鱗可數。亭後疊石。



爲山栽花作徑。

蘇堤春曉亭

蘇堤春曉亭在望山橋南。清聖祖建。後改岑樓。春時晨光掩映。花樹紛披。如排錦鋪繡。

曲院荷風亭

亭在跨虹橋北。九里松旁舊有麴院。多荷。宋稱麴院荷風。清聖祖改爲曲院。建亭。夏景絕勝。

小萬柳堂

小萬柳堂在映波鑾瀾二橋之間。俗稱廉莊。亭軒迴曲。綠柳成蔭。泉石澄清。風景閒雅。

紅櫟山莊

紅櫟山莊在廉莊北。俗稱高莊。樓臺亭閣。構結不俗。夏竹秋菊。冬梅。尤令人

玩賞不置。

### 水竹居

水竹居在丁家山前。與望山橋相對。俗稱劉莊。中有花竹安樂齋。面臨湖山。得天然趣。

### 玉帶橋

玉帶橋在金沙堤。堤爲清李衛所築。堤半築橋。溪流湍激。特設三洞以灑水。狀如帶環。

### 金沙港

金沙港在金沙堤西北。港水自靈隱一帶繞流而下。名兩峯澗。沙皆金色。故亦稱金溪。

### 竹素園

竹素園在湖山春社西。清泉從竹徑出。有蘭亭曲水之致。闢地爲園。清聖祖

題其扁額。

### 鄂王廟

鄂王廟在棲霞嶺之陽。內祀宋岳飛。正殿刻遺像。四壁多嵌飛所書字。及宋高宗手詔。

### 岳墳

岳墳在廟側。明嘉靖間。巡按御史張景刻盡忠報國四大字。階下有柏。號精忠柏。枝幹極蒼勁。露臺下有秦檜王氏万俟卨張浚四像。反接跪地。相傳爲明李隆範銅爲之。

### 湖心亭

湖心亭在外湖中。四面環水。花木叢茂。有欄雕鏤極工。舊有層樓。憑欄四望。羣峯圍列如屏。亭楣上有額。清聖祖書靜觀萬類四字。後有水軒。架於湖面。湖心平眺。爲佳景之一。

## 阮公墩

阮公墩在湖心亭東北。有浮土作圓形。上無亭宇。清阮元濬湖所掘之土棄於此。故名。

## 三潭印月

三潭印月在湖心亭南放生池前。宋蘇軾立三塔於湖。塔如瓶。浮漾水中。所謂三塔亭。引碧流者。後毀。明萬歷間仍置三塔。夜間月光下映。分塔爲三。故有三潭印月之稱。

## 放生池

放生池在湖心亭南。明萬歷時濬取葑泥。繞潭作埂。石橋曲折。護以朱欄。架於魚池之上。

## 退省庵

退省庵在放生池東北。其樓額曰一寄。清彭玉麟於巡閱長江之隙。嘗遊釣

於其間。

小孤山

小孤山在退省庵內。庵今改爲浙江先賢祠。池中有峯矗立。嬌如美人。徐琪題曰小孤山。

昭慶寺

昭慶寺在後湖聖堂橋。爲吳越王所建。歷代屢燬屢修。清順治間重建。寺額有清高宗題深入定慧四字。寺外有青蓮池。萬善橋。內有千佛閣。定觀堂。觀音井。看山亭。臥牛石。

寶石山

寶石山在枕縣錢塘門外。一名石甌山。高六十三丈。山有石奇偉。坊額題曰開頓嶺。

保俶塔

保俶塔在寶石山上。爲吳越王建。俶卽吳越王之名。俗訛稱保叔塔。孤兀峭立。高倚天外。

### 落星石

落星石在保俶塔旁。一名壽星石。石側有亭。曰來鳳亭。清秋木落。巖石瘦削。風景殊絕。

### 川正洞

川正洞在保俶塔後。洞中有石几石櫂。成於天然。洞左有石峽。僅容一人行。奇險異常。

### 大佛寺

大佛寺在寶雲山下。中供大石佛。相傳其頭爲秦始皇纜船石。或曰宋賈似道繫纜石樁。

### 葛嶺

葛嶺在寶石山西。相傳晉葛洪煉丹於此。有煉丹臺。其址尙存。俯視蘇堤。宛如玉帶。

初陽臺

初陽臺在葛嶺巔。遙望東北海中。旭日初升。微露一痕。俄而赤霞萬道。漫滿天空。景幻絕。

棲霞嶺

棲霞嶺在葛嶺西。其地舊多桃花。有水一道。曰桃溪。嶺後有白沙泉。嶺上有妙智寺。

棲霞洞

棲霞洞在妙智寺側。洞窈然而深。兩石相峙如門。遊於其中。覺骨寒神淒。以暑時最宜。

紫雲洞

紫雲洞在棲霞洞右。洞深二十餘級。內外明朗。中有石樓倒垂。下鑄紫雲洞天四大字。

### 壁洞

壁洞在紫雲洞內石壁間。洞內敞豁。當中有孔極小。裂處日光下射。有泉水色極清澈。

### 古劍關

古劍關在紫雲洞西北。旁有宋輔文侯牛皋墓。關南有金鼓洞。石泉清瑩泓碧。深不可測。

### 清漣寺

清漣山在仙姑山北。舊名淨空禪院。建於南齊天福年間。清高宗幸此賦詩。改名清漣。

### 玉泉



玉泉在清漣寺內。水味甘美。甃石爲池。清澈見底。中蓄五色魚。黑背紫尾。長或三四尺。

洗心亭

洗心亭在玉泉上。長廊迴環。畫欄曲折。遊人觀魚於此。揚鬢鼓鬣。浮沈上下。悠然自得。

細雨泉

細雨泉在清漣寺內。泉上有晴雨軒。泉眼下通。浮激波面。每逢斜風疎點。遊人驚雨而去。

靈峯

靈峯在桃源嶺秦亭山之間。鳴泉琮琤。竹木深秀。境至清幽。宋蘇軾有詩題於石壁。

補梅庵

補梅庵在靈峯上。其地故多梅。後漸彫。清季吳興周夢坡補種三百株。構庵其間。故名。

### 靈峯寺

靈峯寺在靈峯巔。建於晉時。寺右有來鶴亭。石徑盤曲旋轉。高二十丈。石磴七十餘級。

### 靈隱山

靈隱山一名武林山。又名靈苑山。山有孤石壁立。大約三十圍。其上開裂。狀似蓮花。

### 雲林寺

雲林寺在靈隱山上。亦名靈隱寺。晉咸和元年僧慧理建。有覺皇殿、直指堂、羅漢殿、金光明殿、輪藏閣、大樹堂、尚鑑堂、華嚴閣、梵香閣、玉樹林、紫竹林、蒙堂、萬竹樓諸勝處。

飛來峯

飛來峯介靈隱天竺兩山間。高僅數十丈。蒼翠玉立。奇兀屈曲。上多異木。矯若龍蛇。翠蕤蒙罩。冬夏常青。峯下巖扁窈窕。曲折通明。巖鑄佛像。相傳爲元僧揚璉真伽所刻。

理公巖

理公巖在飛來峯東南。慧理嘗偃息其下。巖有射旭洞。可容百人。峯石縱橫。回旋曲折。

玉乳洞

玉乳洞在理公巖下。洞內溜乳作花。若刻若鏤。旭光一線。上透極頂。俗稱爲一線天。

冷泉亭

冷泉亭在雲林寺西南。亭依澗臨泉。巖石爲屏。春時草木芬芳。夏時水風涼。

爽。洵爲勝地。

### 北高峯

北高峯在雲林寺後。與南高高峯相對。羣岫屏列。湖水鏡浮。遠望錢江。如匹練之新濯。

### 靈順廟

靈順廟在北高峯頂。俗稱華光廟。有浮屠七級。廟後有平臺。臺前石松一。爲千餘年物。

### 韜光庵

韜光庵在北高峯之南。爲吳越王建。唐時僧韜光卓錫於此。因名。中多名賢遺蹟。懸巖結屋。勢若凌空。山窗礪戶。明淨無塵。泉涓石隙。魚躍池心。微風徐拂。飛溜生寒。夏不覺暑。

### 韜光泉

韜光泉在韜光庵後。峯高百盤。水流曲折。山僧剝竹引泉。達於山廚。水聲琮琤。有如絃索。

### 韜光徑

韜光徑自雲林寺至韜光庵。石磴百數級。松篁夾植。草樹濃密。旭光穿漏。如行深谷中。

### 石樓

石樓在韜光庵內。前對錢塘江。唐宋之間詩樓觀滄海日。門對浙江潮。世稱韜光觀海。以此。

### 金蓮池

金蓮池在韜光庵後。蓮色黃而小。葉橢圓。其莖上下各一葉。洵爲異種。惟是池產之。

### 丹崖

丹崖在韜光庵山後。可觀江海盡處。崖下一洞。昔有僧名眞觀者。居此。因名陀頭石室。

### 下天竺寺

下天竺寺在雲林寺南。初名繙經院。晉僧慧理建。林壑秀美。山石奇俊。唐白居易去杭。嘗携兩石。歸置里第池上。宋蘇軾去杭時。寺僧惠潔亦贈以石。清高宗題寺額曰法鏡。

### 金佛洞

金佛洞在下天竺寺後。內鑄佛像。嵌空玲瓏。瑩滑清潤。林木皆自巖骨拔起。不生而生。

### 三生石

三生石在下天竺山陰。相傳唐李源與僧圓澤善。及澤再生。相遇於此。世遂名石曰三生。

月桂峯

月桂峯在下天竺。上多桂。花白實丹。峯左有日月巖。巖旁一臺。爲晉謝靈運繡經臺。

中天竺寺

中天竺寺在稽留峯下。隋開皇間。西僧寶掌從西域來。入定於此。明賜號中天竺禪寺。

上天竺寺

上天竺寺殿宇宏麗。乃吳越武懿王開路築基。卽地創佛廬。號天竺看經院。後徙今所。宋孝宗改院爲寺。清康熙間。迭經修葺。有御碑文。並法雨慈雲額。乾隆題門額曰法喜寺。

乳竇峯

乳竇峯在上天竺寺南。巖石嵌空。竇孔玲瓏。懸乳如脂。其味甘和可愛。遊人

多喜嘗之。

### 天門山

天門山爲南北兩山之祖。雙峯對峙。其形如門。下有耶當嶺。幽淙嶺。巉石齒齒。頗不易行。

### 柳浪聞鶯亭

柳浪聞鶯亭在湧金門外。宋時有柳浪橋。在清波門外。今無可考。亭內有清聖祖御碑。

### 錢王祠

錢王祠在清波門外。祀吳越武肅王錢鏐。前臨湖流。其地沙岸平堤。垂楊裊裊。萬綠叢中。碧殿丹宮。掩映林表。每逢旭日初升。霞光絢爛。湖波蕩漾。晚霧迷離。其景頗佳。

### 南屏山



南屏山在清波門外。峯巒聳秀。怪石玲瓏。峯下有歡喜巖。兩石離立相對。若老翁邂逅狀。

### 淨慈寺

淨慈寺在南屏山麓。周顯德朝吳越王錢宏俶建。號慧日永明院。明正統間僧宗妙修之。清聖祖南巡幸此。書淨慈寺額及西峯二字。製碑勒石。樓閣軒亭。壯麗與雲林寺埒。

### 南屏晚鐘亭

亭在淨慈寺前萬工池旁。清聖祖南巡時築。夜籟寂靜。寺鐘聲動。山谷皆應。逾時方息。

### 神運井

神運井在淨慈寺香積廚旁。相傳昔建寺時。苦無木材。僧濟顛禱佛。遂有木自井中出。適足建寺之用。寺成乃止。今餘木尙在井中。僧設垣繚之。號古木

井。其說怪誕不可信。

### 小有天園

小有天園在淨慈寺西。舊爲汪氏別業。清乾隆御題山半亭曰勝閣。旁有幽居洞、南山亭。

### 有恆居

有恆居在淨慈寺南。爲顧浩丁月如伉儷別業。丁精繪事。其建築別具匠心。尤合畫理。

### 雷峯

雷峯在淨慈寺北。雷氏築庵居之。故名。有月老祠、夕照寺、蓬萊泉、珍珠泉、白蓮洲諸勝。

### 黃妃塔

黃妃塔在雷峯巔。吳越王妃黃氏建。俗稱雷峯塔。夕陽西墜。塔影橫空。故有

雷峯西照之稱。

慈雲庵

慈雲庵在雷峯西。本名白雲庵。清雍正時。汪氏重葺之。增構亭榭。雜蒔花木。景殊幽勝。

方家峪

方家峪在南屏山之南。巖洞靚深。石色秀異。雖當夏暑。寒砭肌骨。境極蕭幽。遊蹤罕及。

赤山

赤山在蘇堤映波橋西南。與玉岑山相對。水曲爲浴鵲灣。元張伯雨結廬於此。顏曰黃篋。

法雲講寺

法雲講寺在赤山麓。吳越時建。宋元豐間。高麗國王子入貢。因從僧淨源學。

故亦名高麗寺。

### 九曜山

九曜山在南屏山西。東有仙人洞。洞側有明遺臣鄞張煌言祠墓。卽世稱蒼水先生者也。

### 石屋洞

石屋洞在九曜山石屋嶺下。洞底有泉。其盡處。形如螺。額題曰滄海浮螺。今荒寂異常。

### 烟霞洞

烟霞洞在九曜山烟霞嶺。曲折深杳。晉時僧彌洪曾結庵洞口。洞前以石作門。刻仙巖二字。

### 烟霞寺

烟霞寺在烟霞洞側。一名清修寺。清光緒初。閩僧學信募資修葺。沿途栽梅。

花數千本。

呼嵩閣

呼嵩閣在烟霞洞頂。環聳石梁。上建高閣。近俯羣巒。遠吸江海。石壁多鐫刻。名人題詠。

佛手巖

佛手巖在烟霞嶺上。巖石秀麗。奇突外扑。勢若倒垂。有石筍五枝。苔蘚蒼翠。排列若指。

南高峯

南高峯在九隴山北五里許。與北高峯對峙。登臨其巔。縱目四望。之江若帶。平湖如杯。峯上舊有塔七級。今僅存基礎。山椒有巨石。曰先照壇。曉日夜月。自東初升。必先見之。

雙峯插雲亭

亭在行春橋側。適當南北兩峯之間。重巒疊嶂。蜿蜒盤結。上多奇雲。山峯高出雲表。時露雙尖。望之如插。故稱爲雙峯插雲。亭爲清聖祖南巡時建。又有御碑亭在其後。

### 天地洞

天地洞在南高峯下。洞口石筍林立。深邃莫測。有泉水極清澄。其味甘美。大旱不涸。

### 千人洞

千人洞在天地洞右。洞口極窄。僅六尺許。望之如小竇。漸進漸廣。明朗開爽。可容千人。

### 白天窩樓

白天窩樓在南高峯北麓。樓西爲流觀臺。洞壑窈窕。平壤數弓。爲堂三楹。精小絕倫。

### 法相寺

法相寺在三台山穎秀隴。僧法眞遺蛻在焉。婦人來寺進香者。爭撫摩遺像。謂爲宜男。

### 大慈山

大慈山在九曜山西南。山色蒼蔚。中峯隆起。旁舒兩翼。松杉密布。圓岡相對。如覆釜然。

### 大定慧寺

大定慧寺在大慈山南。俗稱虎跑寺。建於唐時。寺外山門頗宏壯。寺有積翠軒。景最勝。

### 虎跑泉

虎跑泉在大定慧寺內。泉清冽澄冷。舊與龍井玉泉齊名。其味實勝於諸泉。相傳昔有二虎跑地作穴。泉遂湧出。故名。清聖祖南巡。題詩云。似恐被人類。

汲取一泓清。迴出山坳。

### 丁家山

丁家山在金沙堤西南。爲南高峯支山。與棲霞嶺烏石峯相拱揖。俯瞰全湖。水天一碧。

### 蕉石山房

蕉石山房在丁家山半。懸崖下有舫室數楹。舫前奇石林立。狀類芭蕉。其根成於天然。

### 蕉屏

蕉屏在蕉石山房前。一石卓立。障如屏風。因稱蕉屏。屏以內。度石牀石几。瑩潔無滓。遊此者。携蕉尾琴。作梅花三弄。古音清越。響入雲霄。以是蕉石鳴琴。亦爲勝景之一。

### 風篁嶺



風篁嶺在靈石山西南。其地多竹。林壑深沈。泉聲潺潺。自龍井而下。四時不絕。景幽勝。

龍井

龍井在風篁嶺南。本名龍泓。其流自深山石隙出。延緣山磴間。泉味甘且清。石亦秀潤。

碧螺峯

碧螺峯在磴道南。秀石森峭。巒翠欲滴。峯上建傑閣。名曰翠峯閣。閣後一崖。障立如屏。

獅子峯

獅子峯在風篁嶺老龍井後。元伯顏曾登此峯。以觀臨安形勢。峯旁有彌陀興福院。

九溪

九溪在煙霞嶺西南。其支流爲十八澗。發源處爲楊梅嶺。泉向東流。曲折縈環。分而爲九。

### 滿覺壠

滿覺壠在楊梅嶺下。地多桂。拔萃岑嶺。數條巖壑。有香雪之稱。秋初遊此。如入衆香國。

### 理安山

理安山在九溪東北岸。其中峯之最高者曰大人峯。迴象峯。獅子峯。風景以迴象峯爲最。

### 理安寺

理安寺在理安山麓。舊名法雨寺。宋理宗改今名。清康熙御題理安寺。石磬正音二額。

### 法雨巖

法雨巖在理安寺禪堂後。巖石宛轉，覆若洞室。巖下有法雨泉。水自石脈中滴下。其流甚細。飛灑空際。非微成雨。下爲清池。可鑑毫髮。巖石鐫滲滴歸源四字。巖旁有精舍。

### 松巖閣

松巖閣在理安寺方丈後崖上。據全寺之勝。昔人詩云。何當老我松巖閣。煮水蒸藜過此生。

### 五雲山

五雲山爲天門山之支脈。五峯森列。林壑蔚秀。相傳山頂舊有五色雲。盤旋其間。故名。

### 雲棲隍

雲棲隍在五雲山腰。石徑幽蔽。仰不見日。延紆屈曲。但覺蒼翠滿目。鳥聲時聞。景佳甚。

洗心亭

洗心亭在雲棲隴前。亭壁左右各闢方窗。綠煙傾映。亭旁有流泉。經此閒坐。萬慮俱滌。

雲棲寺

雲棲寺在五雲山最深處。吳越王建。明蓮池大師卓錫於此。清規至整肅。朝魚暮鼓。與天籟相應。寺外編籬界竹。竹皆一尺圍。枝高葉茂。寺前大竹一竿。清聖祖賜名皇竹。

萬松嶺

萬松嶺在鳳凰山北。蒼松夾道。枝幹盤曲。天風戛擊。松濤與江湖之聲。遙相應和。

鳳凰山

鳳凰山在鳳山門外。形如飛鳳。兩翼軒張。左薄湖干。右掠江濱。其東麓爲南

樂大內所在。山左有報國寺。卽南宋垂拱殿故址。山巔有竅。日月巖。舊曆中秋之月。穿竅而出。

聖果寺

聖果寺在鳳凰山上。寺創於唐。背山臨水。風景殊勝。其地左右多桃。故有聖果桃之稱。

捍海塘

捍海塘在候潮門外。卽吳越王錢鏐所築江塘。江干十里。煙火萬家。曉霧晚炊。雲樹迷離。

錢塘江

錢塘江舊與西湖通。自漢築錢塘而江湖隔。其潮逆流而上。受龕楮二山約束。蹙不得騁。與山爭勢。洶而爲濤。舊曆八月最著。觀潮者肩摩轂擊。潮初起時。遙望海門。白光一線。俄而霜戈銀甲。萬馬騰空。流珠濺沫。飛灑天中。清聖

祖建亭江岸。題活波利濟四字。

### 鐵幢浦

鐵幢浦在江岸。爲吳越王射潮箭所止處。江潮衝擊城下。以強弩射之。嘗立鐵幢。因名。

### 龍山

龍山距城十里。壁立尖聳。晉郭璞所謂龍飛鳳舞是也。山上有石龍。其下爲龍居里。

### 靈光洞

靈光洞在龍山頂。一名登雲洞。深百餘步。濶十餘丈。有梁龍德元年題名。下爲天龍寺。

### 六和塔

六和塔在月輪山頂。宋開寶二年。智覺禪師延壽開山建塔。凡九級。中藏舍

利紹興中僧智曇重建七級而止。有磴道可登。環壁刊經及佛。清高宗巡幸。御製塔記。題書扁額。

月輪寺

月輪寺在六和塔後。亦稱開化寺。宋僧延壽建。舊名壽寧院。寺有金魚池。秀江亭。諸勝。

定山

定山一名獅子山。高七十丈。周七里有奇。江濤至此。輒抑聲。過此則雷吼霆怒。世稱避潮處。

浮山

浮山在定山南。與漁浦諸山相望如犬牙。江潮直抵山下。怒激而回。諺謂之回頭浪。

吳山

吳山在杭縣城南隅。亦名胥山。相傳吳浮子胥於江。吳人憫之。立祠江上。因之名山。奇崿危峯。登臨其巔。縹渺凌虛。碧天四匝。前江後湖。悉在眼底。山有城隍廟。俗呼城隍山。

### 巫山十二峯

巫山十二峯在吳山火德廟前。有石十二。玲瓏瘦削。如山峯離立。旁有亭曰巫峽峯青。

### 寶月山

寶月山在吳山北。山南爲鐵冶嶺。元楊維禎讀書於此。因更號鐵崖。有小蓬壺。草玄閣諸勝。

### 七寶山

七寶山在吳山南。山有七寶寺。因名。其巔石而砥平。號大觀臺。有坎卦壇。青霞洞。石龍泉。



### 瑞石山

瑞石山在吳山東南。巖石玲瓏。洞穴深窈。爲湖山陝區。石壁鐫第一山。紫陽洞天等字。

### 紫陽庵

紫陽庵在瑞石山上。元時建。相傳丁野鶴棄俗。全真於庵中。旁有紫陽洞。南有丁仙亭。

### 伍公山

伍公山在吳山東北。上有伍公廟。內祀吳行人伍員。清高宗御題廟額靈依素練四字。

### 吳山第一泉

吳山第一泉在伍公山麓環翠樓下。泉水清冽。盪石爲井。井壁鐫吳山第一泉五字。

崇義禪

崇義祠內有宋石幢。止水池。峨嵋山館。夕照樓。葵向亭。金粟。堆梅坡。方竹坪。稱爲八景。

法華山

法華山在秦亭山之西。叢薄深密。杳靄雲封。相傳晉時有法華僧靈跡。舊有法華寺。

花隄

花隄在法華山麓。地極幽逸。雲木蔭翳。中多古庵。有橋曰藕香。溪聲淙淙然。據石靜聽。怡性悅情。茂林修竹間。時出小徑如修蛇。蜿蜒曲屈。晨鐘暮鼓。梵唄清越。眠雲室最幽。

石人隄

石人隄在石人嶺上。有石直立。其形似人。高大如之。故名。相傳吳大帝石杵

在此。

夕照庵

夕照庵在安樂山麓。晉慧理退隱處。中有雙松堂。古幹龍鱗斑駁。高入雲霄。爲元明間物。

梅花泉

梅花泉在西溪華亭石隄間。有泉一泓。雪漚旋起。作梅花瓣。與溪上梅花相映。清素一色。清聖祖巡幸製詩。有十里清溪曲。修篁入望森。暖摧梅竹早。水落草痕深之句。

南漳湖

南漳湖在古蕩西。一名河渚。亦號蒹葭深處。烟水蒼茫。曲折幽邃。舟行若窮。風景絕勝。

秋雪庵

秋雪庵在南漳湖旁。四圍皆水。蒹葭叢密。明陳眉公取唐人秋雪濛釣船之句。顏其庵。

### 桐陽

桐陽在大嶺西南。山迴路轉。境至幽邃。林木葱翠。溪聲淙瀾。明末陸忠節公培殉於此。

### 白龍潭

白龍潭在龍門山下。巖石奇險。苔蘚陰鬱。潭深千尺。奔流下注。如潑萬斛珠於碧玉峽。誠奇觀也。其瀉響作聲。迸裂蕭瑟。轟雷疾霆。哀絲急筑。莫喻其變。山川奇邃。於此爲極。

### 荆山

荆山在西溪西北。高二百丈。周五里。岡巒圓秀。溪流雙清。中有七十二賢人峯。甚有名。

馬塍

馬塍在武林門外。以吳越錢武肅王畜馬得名。宋韓蘄王嘗築別墅。有梅坡芙蓉堆諸勝。

湖墅

湖墅在馬塍西。舊有八景。明王希範所題。有歸錦、華光、江漲、三橋、鼎峙、河上、成三角形。

珠潭

珠潭在黑橋北。相傳爲宋賈似道別業。每當夜半。纍纍珠泡。吐納潭心。月光映射。洵爲奇觀。

皋亭山

皋亭山在杭縣城東二十里。前掩其脊。呼曰半山。冬日積雪。自北墅遠眺。宛如玉柱。

黃鶴山

黃鶴山在皋亭山北。巔有龍池。池出雲則雨。山陽有龍居寺。舊名永慶禪寺。建於唐時。

佛日隴

佛日隴在黃鶴山南。溪流屈曲。叢木掩映。水底怪竇。如瑪瑙色。上有大松。爲唐宋間物。

桐扣山

桐扣山與佛日隴相接。山下有石鼓湖。晉武帝時。岸出石鼓。張華取蜀桐刻魚形扣之。

超山

超山在杭縣城東北六十里。以其超出皋亭黃鶴之外。故名。山多梅。遠馥林麓。近偃陂陀。香雪如夢。山有香海樓。冬時瓊玉滿林。吐蕊爭艷。有宋梅一本。

古幹詰屈。苔蟠其身。

### 小隱山

小隱山在富陽縣北。宋謝峯居此。其子景初景溫。築室於山之半。手植雙松。至今猶存。

### 大滌山

大滌山在餘杭縣西南。晉郭文舉隱此。山徑清幽。行此者可洗滌塵心。上有許邁丹竈。

### 三休亭

三休亭在杭縣九折巖南。亭突兀孤高。宋蘇軾詩。三休亭上工延月。九折巖前巧貯風。

### 百尺樓

百尺樓在海寧縣百尺浦上。晉時吳越王建。登此眺望。怒濤奔騰。有吞天沃

日之勢。

## 二 嘉興

嘉興在杭州東北。東瀕錢塘海灣。西北控太湖。貫以運河。地勢平行。水澤流通。土田腴沃。

### 杉青閘

杉青閘在嘉禾縣端平橋北。中有落帆亭、酒仙祠諸勝。舊曆六月。池荷盛開。遊人最多。

### 南湖

南湖在嘉禾縣宣公橋。湖中產菱。味絕佳。頗著名。有清高宗御碑。彭剛直公所書梅莊碑。

### 瓶山

瓶山在嘉禾縣城內混堂街口。山無樹木。相傳數千年前爲瓶窰。中多古瓶。



禁人開掘。

### 永安湖

永安湖在海鹽縣澉浦鎮西。一名澉湖。四圍皆山。峯巒秀翠。泉流瑩碧。亦號曰小西湖。

### 烟雨樓

烟雨樓在嘉禾縣鴛鴦湖上。瑠窗綺閣。四面臨水。每當輕烟拂渚。山雨欲來。風景最勝。

### 弄珠樓

弄珠樓在平湖縣當湖中。以當湖九水。匯流環曲。如九龍弄珠於溟渤間。一名戲珠亭。

### 煮茶亭

煮茶亭在嘉禾縣南湖中。宋蘇軾與文長老嘗過湖上。汲水煮茶。後人建亭。

以識其勝。

### 梅里

梅里在嘉禾縣城南王店鎮。爲王達之故居。栽梅百畝。明洪武間。王鏞兄弟亦居此。

### 朱買臣墓

朱買臣墓在嘉禾縣城東。墓之北有一土塚。相傳爲買臣妻所葬之處。俗呼爲羞墓。

### 梅花道人墓

梅花道人墓在嘉善縣東。元高士吳鎮。號梅花道人。嘗自署墓碑曰梅花和尚之塔。

## 三 湖州

湖州在杭州之西北。其地西南憑天目。東北瀕太湖。東引運河。西控青峴。城

臨苕溪水上。

昇山

昇山在吳興縣東。王羲之嘗登其上。顧謂賓客曰。百年後。孰知王逸少與諸卿至此乎。因名昇山。

卞山

卞山在吳興縣西北。一名弁山。宋葉石林嘗居此。范成大。有游弁山石林先生故居詩。

玲瓏山

玲瓏山在卞山之北。峯岫奇峻。巖石嵌空。林木蔚秀。泉流清潔。其風景與杭縣南屏相埒。

罨畫溪

罨畫溪在長興縣西。一名西溪。古木夾岸。叢篠翳其下。朱籐施其上。花開時。

遊人競集。

### 前溪

前溪在武康縣城內縣署前。晉車騎將軍沈充曾家於此。樂府有前溪曲。卽充所製。舊傳爲南朝習樂之所。唐崔顥詩。舞愛前溪好。歌憐子夜長。卽詠此。今惟水流涓潔而已。

### 梅溪

梅溪在吳興縣北。一名紫梅溪。溪上有紫梅成林。冬時其花盛開。霞光掩映。鮮如赤錦。

### 白蘋洲

白蘋洲在吳興縣東南一里。梁吳興太守柳惲詩。汀洲採白蘋。日晚江南春。因以爲名。

### 消暑樓

消暑樓在吳興縣東南城上。與清風會景二樓相鼎峙。前翼譙門。後擁下倉。爲一郡偉觀。

浮暉閣

浮暉閣在吳興縣西苕溪上。賈收耘老所居。景物清曠。蘇軾嘗遊。此題詩畫竹於壁上。

溪光亭

溪光亭在吳興縣城內。宋縣令鄭昭先建。取蘇軾詩有溪光自古無人畫之句。摘以爲名。

西亭

西亭在吳興縣南。梁太守柳惲建。前臨苕溪。遠峯繚紆。清流迴環。後人亦稱爲柳惲亭。

三癸亭

三癸亭在吳興縣杼山上。唐顏真卿爲處士陸羽建以癸年癸月癸日成。因名曰三癸。

#### 四 寧波

寧波在紹興東。古稱明州。其地突入東海。成一小角。南有象山半島。西南有四明山。爲甬江所出。其城瀕於甬江東南岸。與日本葡萄牙通商最早。唐時有日本使臣常於此登陸。

#### 四明山

四明山在鄞縣西南。巔有方石。疊成四穴。上通光線。天宇澄霽。望之如戶牖。名曰石窗。

#### 天童山

天童山在鄞縣東。山徑深迴。岡巒幽奇。松柏夾道。溪澗窈邃。中有天童寺。爲千年古剎。

### 雪竇山

雪竇山在奉化縣西。上有含珠林、千丈巖、瀑布泉、桃花坑諸勝。晨霞暮靄間，尤爲勝概。

### 陶公山

陶公山在鄞縣東東錢湖中。山峯圓秀。相傳陶朱公嘗隱居於此。其釣魚磯遺蹟尙存。

### 招寶山

招寶山在鎮海縣東北城外。舊名候濤山。昔以諸夷入貢，停泊於此，改名。前臨大海，四望長天，浩渺無際。海中諸島，隱隱如鳧鷖。巨浪拍空，時時飛聳欲墜。誠天地一奇觀也。

### 月湖

月湖在鄞縣城內西隅。亦名西湖。舊有十景：柳汀、雪汀、芳草洲、芙蓉洲、菊花

洲、月島、松島、花嶼、竹嶼、煙嶼。今大半廢圯無考。惟亭臺幽雅。花木繁植。春夏之間。多有游賞者。

### 慈溪

慈溪在慈溪縣西南。相傳漢孝子董黯母。好飲此水。黯乃築室溪旁。汲以供母。因名。

### 靈峯山

靈峯山在鎮海縣東南二十五里。山有寺曰靈峯。每逢香市。遠近男女進香。擁塞道路。

### 四顧山

四顧山在鎮海縣東十五里。山勢雄壯。其巔砥平。有石櫃一方。甚巨。相傳中藏古劍古甲。

### 蛟門山



蛟門山在鎮海縣東海中。與虎蹲山對峙。其形如門。海潮至此。狂嘯怒吼。聲聞數十里。

### 虎蹲山

虎蹲山在鎮海縣東海中。蛟門山之西。屹立海口。蹲踞如虎。山石爲浪所激。銳如齒牙。

### 響巖

響巖在鄞縣西南。壁立千仞。下瞰流水。微波蕩激。其聲清碎。相傳賀知章嘗隱於此。

### 虞喜宅

虞喜宅在慈谿縣鳴鶴山麓。林壑秀美。相傳晉時虞喜嘗結廬隱居於此。三召不起。

### 賀季真祠

賀季真祠在鄞縣城內月湖中。內祀賀知章。有逸老堂。相傳宋時郡守莫將爲賀知章建。

## 五 定海

定海古甬東地。在寧波之東海中舟山島上。其城在島南端。地勢暗接大陸之仙霞山脈。

### 桃花山

桃花山在定海縣東南海中。山石有紋。形似桃花。嵌空靈巧。精如刻鏤。屹立巨浸中。

### 竹嶼

竹嶼在定海縣西南海中。兩山對峙。屹立如門。上有叢竹。夏時濃影蔽日。海風清涼。

### 普陀山

普陀山在定海縣東海中。孤山獨峙。縱橫各十里許。其地兼山海之勝。世稱海外桃源。

妙莊巖路

妙莊巖路長約五六里。道途平濶。皆琢石甃成。兩旁古木叢植。枝葉交叉垂蔭。風景殊勝。

白華山

白華山在正趣峯下。有巨石高四丈。矗立山麓。上鐫白華山三字。森林繁密。葱鬱可愛。

普濟寺

普濟寺在靈鷲峯下。俗稱前寺。正殿曰大圓通殿。前多古木。黃瓦紅牆。頗極巍麗之觀。

海印池

海印池在普濟寺前。廣十餘畝。盛產荷花。冬時池水淤淺。蘋藻叢生。有御碑亭在池南。

### 永壽橋

永壽橋在普濟寺前。俗名羅漢橋。跨海印池上。濶四丈。長十餘丈。石欄柱頭。彫刻極工。

### 太子塔

太子塔在普濟寺南。元代諸王爲孚中禪師所建。以太湖石琢成。凡五層。每層鐫佛像。

### 千步沙

千步沙在東海濱。長約五里。爲海浪挾沙積成。怒潮拍岸。震撼激蕩。怪幻詭奇。不可名狀。

### 盤陀庵

盤陀庵在盤陀峯下。門前壁上有盤陀庵三字。爲董其昌手筆。內有甘露池。水波澄碧。

### 西天法界

西天法界在西山。俗名西天門。兩石對峙。上有巨石覆之。中豁如門。題曰寰海鏡清。

### 梅福庵

梅福庵在梅岑峯上。爲南山最高處。林石幽秀。峯下有丹井。相傳漢梅福嘗隱修於此。

### 盤陀石

盤陀石在普陀山之西境。縱橫約十餘丈。其下另有一石。盤陀託焉。上多人題字。

### 觀音洞

觀音洞在梅岑峯後。洞口狹小。石壁蒼古。外砌以牆。上題觀音古洞。內供觀音大士像。

### 二龜聽法石

二龜聽法石在盤陀石之西。山巔一石似龜之蹲伏。其下一石似龜之昂首。敬上。因名。

### 潮音洞

潮音洞在紫竹林內。爲山石裂罅所成。高約二十餘丈。洞有二門。奔濤衝入。噌吰作大聲。

### 紫竹林

紫竹林在普陀山南。竹木扶疏。風景絕勝。其石剖視之。白質黑章。有花竹草木之紋。

### 南天門

南天門在普陀山之正南。其地伸入海中。有巨石對立。門戶天成。奇異莫狀。故稱天門。

仙人井

仙人井在几寶嶺下。爲泉水湧成。上覆石窟。盛暑之時。取井水嘗之。味清冽。涼沁齒頰。

朝陽洞

朝陽洞在几寶嶺盡處。面臨東海。登其上。晨觀日出。旭輪初升。霞映天空。誠爲奇勝。

長生禪院

長生禪院在前後兩山之中。面臨千步沙。夜籟寂靜。海潮拍岸。作鐵馬萬騎奔騰之聲。

雪浪山

雪浪山在佛頂山之右。雙峯並峙。上多白石。林木輝映。瑩然如積雪。鬱然如擁浪。故名。

### 法雨庵

法雨庵在雪浪山後。俗稱後寺。其殿宇規制。式同普濟寺。門前林木葱鬱。景緻佳絕。

### 佛頂山

佛頂山爲普陀最高處。登臨其巔。縱目四顧。滄溟茫漾。島嶼隱現。巨浪洪濤。矗立如壁。

### 雲扶石

雲扶石在西茶山上。一石高聳雲表。詭危奇險。題曰雲扶。其下兩石如欹。題曰海天佛國。

### 蓮花洋



蓮花洋在普陀山西南。自佛頂山俯視之。海水環曲如帶。小島散布其間。歷落有致。

### 梵音洞

梵音洞在普陀山極東盡處。洞極深廣。兩崖削壁裂罅。開敞如門。海潮衝入。澎湃有聲。

## 六 紹興

紹興在杭州東南。南據會稽山。北臨錢塘灣。襟以浙江。帶以錢清。貫以剡溪。溝以運河。

### 府山

府山在紹興縣城內舊府署西。山巔有望海亭。風景甚佳。舊曆四五月間。遊人極盛。

### 鑑湖

鑑湖在紹興縣南。一名鏡湖。泉水清秀。唐元宗賜監秘書賀知章鑑湖一曲。亦稱賀鑑湖。

### 興隆山

興隆山在紹興縣城內。一名種山。盤繞迴抱。勢若臥龍。亦稱臥龍山。越大夫種葬此。

### 蕭山

蕭山在蕭山縣西。晉許詢嘗居此山。憑林築室。良晨月夜。歌嘯其間。蕭然自放。亦名蕭然山。

### 嵯山

嵯山在嵯縣東。山下有古亭。倚山臨江。松嶺森蔚。沙渚淨明。王元琳謂其山爲神明境。

### 剡溪

剡溪在嵊縣南。一名戴溪。戴安道居此。王子猷嘗於雪夜由山陰乘小舟訪之。至門而返。

### 禹穴

禹穴在紹興縣會稽山陽明洞外。飛來石下。有孔穴深邃莫測。相傳爲夏禹藏書處。

### 戒珠山

戒珠山在紹興縣東北。本名戴山。晉王羲之故宅。在其山下。今爲戒珠寺。山因以名。

### 若邪溪

若邪溪在紹興縣南。昔西施采蓮。歐冶子鑄劍。皆於此。漢鄭宏徵時。亦嘗負薪於溪旁。

### 曹娥江

曹娥江在紹興縣東南。曹娥上虞人。其父弄潮。爲水所淹。娥亦投江死。經五日。抱父屍出。

### 鵝池

鵝池在蕭山縣城內。晉王羲之善筆札。性復好鵝。所在穿池滌墨。其旁必有畜鵝之所。

### 七星巖

七星巖在紹興縣河橋三里。山明水秀。多名人題詠。山下有三洞。幽邃清潔。可以避暑。

### 千秋亭

千秋亭在紹興縣北三十里。漢蔡邕避難江南。嘗宿於此。一名柯亭。有清高宗御製碑文。

### 蘭亭

蘭亭在紹興縣偏門外二十七里。有曲水流觴之勝。晉王羲之嘗宴飲於此。作序記之。

### 越王臺

越王臺在紹興縣城內。臥龍山東北。爲越王勾踐登眺之所。今郡人亦多登覽於此。

### 尙書郎

尙書隲在紹興縣東南。齊尙書孔稚圭之山園。今園已不可考。惟尙書隲基址尙存。

### 曹娥碑

曹娥碑在曹娥江上廟側。漢上虞長度尙立碑。尙弟子邯鄲淳撰。後蔡邕題黃絹幼婦外孫蠶白八字於碑陰。魏武帝過此。以問楊修。修曰。卽絕妙好詞四字。魏武歎爲奇才。

### 題扇橋

題扇橋在莪山下。王右軍居此。遇一老姥賣扇。右軍題其扇頭。姥初有慍色。及出人競買之。他日姥又持扇乞書。右軍笑而不答。

### 西施村

西施村在蕭山縣之西。地有東施東施二村。西施生於西村。有浣紗石。爲西施浣紗處。

### 窆石亭

窆石亭在紹興縣禹陵。昔禹葬會稽。取此石爲窆。上有古隸。不可卒讀。今以亭覆之。

## 七 台州

台州在紹興南。以天台山得名。三面阻山。惟東面瀕於東海。天台山蜿蜒東海之濱。如衣之有緣。有永安溪。自仙居東流經府城南。東南流會永寧江。由

海門故衛入台州海灣。

### 天台山

天台山在天台縣北。峯巒高峻。鬱然奇秀。上凌青霄。山麓有石梁。闊不盈尺。長數十丈。下臨絕澗。奔流湍急。危石嶙峋。奇險絕倫。人多不敢濟。山巔有瓊樓。玉闕。碧林。醴泉。諸勝。

### 華頂峯

華頂峯在天台山第八重最高處。絕頂有降魔塔。東望滄海。瀾漫無際。號爲望海尖。

### 桃源洞

桃源洞天台山南。一名劉阮洞。相傳漢永平時。劉晨阮肇入山採藥。遇仙女於此。故名。

### 巾子山

巾子山在臨海縣東南。與小固山相連。兩峯並列如蛤。頂有雙塔。塔南有翠微閣。

### 桐柏山

桐柏山在天台山北。上有九峯。蔚然奇秀。林木蒼翠。晉王右軍與支道林常往來於此。

### 萬壑風煙亭

萬壑風煙亭在臨海縣舊府署後。萬山拱揖於前。一水縈繞於旁。登覽其間。最爲奇勝。

### 小樊川

小樊川在黃巖縣北六潭山。宋朱文公嘗著書於山麓。名爲小樊川。題曰溪山第一。

### 浣月亭



浣月亭在臨海縣東湖中。其北爲湖山寺。其西爲樵雲閣。湖光山色。交相輝映。洵爲勝地。

### 梅花吟社

梅花吟社在太平縣西北。山有梅花洞。洞外多梅。枝幹蒼鬱。花開極盛。昔逸士林原縉、翁子實、邱海、何及、邱鐸、王禮、何起直、狄常、程完九人。嘗於此結吟社。號爲花山九老。

### 鄭虔宅

鄭虔宅在臨海縣城內舊府署東。鄭虔以廣文館學士貶州司戶。嘗築室退居於此。

## 八 金華

金華在紹興西南。山川絳麗。據有金華之秀峯。東陽江挾衆水與衢港會。北流爲蘭溪。

金華山

金華山在金華縣北。一名北山。又名長山。山有三洞。上曰朝真。中曰冰壺。下曰雙龍。均深秀。

赤松山

赤松山在金華縣北。一名臥羊山。上有赤松宮。祠漢黃初平。相傳卽其叱石成羊處。

穀水

穀水在蘭溪縣西南。一名蘭溪。兩崖多蘭蕙。春時花開。清香撲鼻。水波縈迴。紋類羅縠。

畫溪

畫溪在東陽縣西南。一名東陽江。羣峯環抱。水流縈紆。林木深鬱。花草叢繁。風景如畫。

繡川湖

繡川湖在義烏縣西。湖中多寺宇亭臺。以供游賞。夏時荷花極盛。歌舸酒舫。四時不絕。

椒石潭

椒石潭在蘭溪縣西北椒石山下。有巖洞與潭水平。水從外入。不見其溢。莫知其洩處。

八詠樓

八詠樓在金華縣城內西南隅。卽沈約所建元暢樓。約有八詠詩。宋郡守馮伉因更名。

蠟展亭

蠟展亭在武義縣東明招山前。相傳晉阮孚隱此。孚嘗著屐遊山。後人以其遊處建亭。

## 涵碧亭

涵碧亭在東陽縣南。唐寶歷中縣令于興宗建。下穿方池。以引清水。爲宴飲遊覽之所。

## 水樂亭

水樂亭在東陽縣西南。兩山對峙。有飛泉數十丈。細若練絹。循巖下瀉。冷然有聲。如洞簫之幽咽。古琴之清越。宋時縣令王概築亭於澗上。蘇子瞻子由俱賦詩以紀之。

## 九 衢州

衢州在金華之西。地勢積高。西連黟山之脈。以通安徽。西南倚懷玉山。以界江西。南據仙霞嶺。以達福建。唐末黃巢轉掠浙東。刊山開道七百餘里。直趨建州。卽今仙霞關之道。

## 仙霞嶺

仙霞嶺在江山縣南。宋史浩帥閩過此。以石磴路。趙汝騰詩。鷄鳴秣馬度仙霞。鳥道迢遙望去踪。

### 趙公巖

趙公巖在常山縣東北。泉石清奇。林木蒼蔚。地絕幽勝。宋趙清獻公抃嘗讀書於巖下。

### 翠微山

翠微山在西安縣東。山頂平廣。旁有仙巖。中空可坐數十人。明太祖書仙巖洞天四字。

### 浮石潭

浮石潭在西安縣西北。石高丈餘。水漲不沒。唐白居易詩。浮石潭前停五馬。卽指此。

### 女樓

女樓在西安縣城西北隅。唐崔耿爲郡守時重建之。名曰東武樓。其記有云。耿也本清河東武城人。因其舊址。改作新樓。北向臨風。萬感俱集。強名東武。以成愚志云爾。

### 逸老亭

逸老亭在西安縣北。宋趙清獻公抃歸老時所築。又有濯纓亭、水月亭皆爲公遊覽處。

### 殷浩宅

殷浩宅在西安縣南。殷浩征姚襄敗績。坐廢徙信安居此。終日書空作咄咄怪事四字。

### 證夢亭

證夢亭在西安縣城內舊府署前。唐豆盧署嘗得一夢。謂當爲此郡守。後果然。乃立亭。

## 十 嚴州

嚴州在杭州西南。地當黟山之脉。東面階級層。西向層累遞高。城據新安江之西北岸。

### 嚴陵山

嚴陵山在桐廬縣西。一名富春山。清麗奇絕。號爲錦峯繡嶺。漢嚴子陵嘗耕釣於山下。

### 桐君山

桐君山在桐廬縣東。一峯陡立。下瞰桐溪。昔有一人采藥於此。問其姓。指桐以示。因名。

### 小金山

小金山在淳安縣西。兀立江心。出沒蒼煙黃水間。古樹蕭然。巖石峻嶒。苔蘚如繡。

印渚

印渚在遂安縣西白石山下。山中產白石英。昔充貢品。渚多巉石。石紋深刻如印。故名。

垂雲洞

垂雲洞在桐廬縣西北。洞口藤蘿交加。怪石垂下。行數步。入一石門。其內曠然開朗。

百丈澗

百丈澗在遂安縣霞源山頂。有二石池。瀉作瀑布百餘丈。下有叢石激水。聲震巖谷。

嚴陵釣臺

嚴陵釣臺在桐廬縣西富春山下。古木叢林。深奇鬱秀。宋范仲淹建嚴先生祠堂於下。



### 思范亭

思范亭在建德縣城內。舊府署西有竹閣。宋范仲淹守郡。嘗賦詩於此。後卽其地建亭。

### 溪山偉觀亭

溪山偉觀亭在建德縣城上。羣山獻奇。二水成字。登覽其上。舉目盡得之。爲一郡偉觀。

### 高風堂

高風堂在建德縣舊府署東。宋紹興年間建。東北有值賢松月二亭。堂北有柏。題曰壽柏。

## 十一 温州

温州在台州之南。東瀕東海。地據括蒼雁蕩二山。甌江斜貫其間。其城瀕於甌江南岸。

## 雁蕩山

雁蕩山在樂清縣東南。春雁歸時。多宿於此。因名。峭峻險怪。森然干霄者。凡七十七峯。

## 吹臺山

吹臺山在永嘉縣南。上有王子晉吹笙臺。地產椅桐。梁邱遲常採琴材。寄贈柳文暢。左源山在樂清縣東北。山有梅隱、葦湖、左嶺、小雁蕩、四景。相傳王十朋嘗卜居於此。

## 謝客巖

謝客巖在永嘉縣東飛霞山麓。謝靈運書白雲曲青草吟於崖上。今惟謝客巖三篆字尙存。

## 白石巖

白石巖在樂清縣白石山。山多巖洞。深邃幽奇。石色如玉。名白玉洞天。亦名

玉甌峯。

仙巖

仙巖在瑞安縣東北四十五里。上有瀑布。宋陳傳良讀書於此。朱子嘗書溪山第一四字。

戲綵堂

戲綵堂在永嘉縣城內。宋趙巖倅郡時。迎父清獻公就養。築堂以居之。清獻嘗賦詩其中。

謝公樓

謝公樓在永嘉縣拱辰門上。謝靈運建。謝守郡時。每於良辰佳節。與僚友遊憩於此。

北亭

北亭在永嘉縣北五里。相傳謝靈運罷郡時。與吏民相別於此。後人懷之。卽

其地建亭。

### 觀潮閣

觀潮閣在瑞安縣峴山上。宋時建。王十朋詩。高照無地屹山腰。今古知觀幾度潮。

## 十二 處州

處州在温州西北。地居括蒼仙霞二嶺間。山溪浚急。太溪淺溪及好溪合流。是爲甌江。

### 蓮城山

蓮城山在麗水縣西。一名小括蒼山。衆山環簇。狀如蓮花。山徑盤紆。又名九盤嶺。

### 小蓬萊

小蓬萊在縉雲縣東仙都山。山下有潭。中有小島。多怪石奇樹。遊人至此。迴

出塵外。

突星瀨

突星瀨在麗水縣東。晉王羲之遊此。歎其奇絕。書突星瀨三字勒石。後人推墮潭中。

好溪

好溪在麗水縣東十里。本名惡溪。唐宣宗時。刺史段成有善政。遊憩於此。民遂改名好溪。

見山亭

見山亭在松陽縣上方山。宋沈晦爲郡守時。遂家於此。又有冷風臺、梅花堆、垂雲巖、諸勝。

忘歸臺

忘歸臺在縉雲縣吏隱山。唐李陽冰爲邑令。任滿。築臺隱此。鑿巖石篆吏隱。

山三字於上。

南園

南園在麗水縣小括蒼山。唐時所築。宋陸放翁詩。安用移封向酒泉。醉鄉只擬乞南園。

留棧閣

留棧閣在龍泉縣濟川橋畔。蘇軾書榜。陳舜俞詩。長橋跨岸虹垂地。高閣凌雲蜃吐樓。

中華名勝古蹟 第十編 浙江

